

張說之文集

開化圖書館  
kaohua library

開化圖書館

Kaishua library

開化圖書館

Kaichua library

開化圖書館

kaikwa library

張說之文集卷第十三

贊

蒲津橋贊

孔子堂杜預贊

皇帝馬上射贊

盧舍那像贊

崔日知寫真贊

二法堂贊

般若心經贊

善法堂贊

三歸堂贊

座右銘

精思院天尊贊

煖硯銘

進筆硯架銘

溫泉箴

素盤盃銘

東山記

別揚盈川炯箴

蒲津橋贊

易曰利涉大川濟乎難也書曰造舟為梁通乎險也  
域中有四瀆黃河是其長河上有三橋蒲津是其一  
隔秦稱塞臨晉名關關西之要衝河東之輻湊必由  
是也其舊制橫絙百丈連艦十艘辦修竿以維之繫  
圍木以距之亦云固矣然每冬冰未合春渚初解流  
澌崢嶸塞川而下如礎如臼如堆如阜或擬或棍或  
磨或切綆斷航破無歲不有雖殘渭南之竹仆隴坻  
之松敗輶更之磬不供胥津吏或罪縣徒吉勞以為

常矣開元十有二載皇帝聞之曰嘻我其慮哉乃思  
索其極敷祐于下通其變使人不倦相其宜授其有  
司俾鉄代竹取堅易脆圖其始而可久紆其終而就  
逸受無疆惟休亦無疆惟恤於是大匠截事百工獻  
藝賦晉國之一鼓法周官之六齊飛廉燭炭祝融理  
爐是鍊是烹亦錯亦鍛結而為連鍊鎔而為伏牛牒  
立於兩岸襟束於中潭鑊以持航牛以驚纜亦將厭  
水物莫浮梁又䟽其中間畫其鷁首必使奔漸不突  
積渡不隘新法既成永代作則原夫天意有四時焉  
濟仁人也利物義也順事禮也圖遠智也仁以平心

義以和氣禮以成政智以節財心平則應諧百神矣  
氣和則感生萬物矣政成則又文之經矣節財則豐  
武之德矣故天將儲其禎地將阜其用人將盈其力  
聖皇之道乾乾翼翼觀藝而無窮詠功而無極

皇帝馬上射贊

第一

甘泉頓射飛野雞一隻走狐二走兔十四不隔箭連  
中五隻

一 面昭仁 三 驅示武 走則發射 伏則不取

第二



中鷹前兔

寒兔滅沒

疾鷹逞巧

鳴鏑洞飛

失雋亡狡

第三

福陽頓同日中狗前兔

狡兔雋大

力奔勢迫

持圓束飛

捨拔先獲

望賢頓停日射高飛鴈一隻走麋二走兔三十六不

隔箭連中五隻

獸殪山豪

鳥落雲雋

貫三疊兩

血不濺刃

望賢頓中獾狐

夜鳴之鳥

是謂獾狐

除人之惡

應箭而鋪

望賢頓隔馬射中麋

趨趨牙麋

寒草同色

隔馬百步

一縱而側

第四

仙遊頓中麋一走狐三走兔十八不隔箭連中八隻

天子省歛

薄守岐湯

躬射五十

以奉蒸嘗

第五

文山頓射麋不隔箭連中二走狐一走兔二十一隻

我将獻鮮

從禽於野

一日百中

以威天下

武停頓而後射走兔其中射兔十九隻不隔連中十

一隻走狐三走麋

霜兔斗迴 雲龍騰過 天旋月滿 舍矢如破

飛林頓分駿射野狐中

有芄者狐 起帝之祐 分駿遠發 應踣于手

鷄子搦鳩不着飛過在後箭發應弦而落

驚鳶上飛 鷲集橫搏 矯箭爭中 紛然旋落

一箭中兩虎橫貫走五十餘步方倒

雙鹿並去 一箭橫連 上思陵寢 以獻時鮮

是日還宮苑內用大箭射走四十口分賜諸王郡王

及從人等

帝入靈囿 數百麇鹿 射其四十 頒諸群后

孔子堂杜預贊

猗歟杜侯 發揮孔聖 春秋既立 王道以正

列國行事 君子莫之 他人有心 予忖度之

推凡是列 定罪原詞 開我後學 從事先師

金紫光祿大夫太常卿上柱國中山郡公崔

日知寫真圖贊

廓哉中山 霧宇廟徹 逸韻豪爽 達音妙絕

孝盡思成 忠全見節 優游宮侶 蕭條禪悅

白髮傳貌 青松拂雪 要之歲寒 是望邦傑

盧舍那像贊 井序

詩云哀哀父母生我劬勞欲報之德昊天罔極是傷  
不可止也戀而懷無所及之感其有飾聖以資親修  
法以展慕豈非孝子持明之心哉武擔山靜亂寺盧  
舍那丈六鉄像者沙門履徹為先妣用無價黃金之  
裝也徹師俗姓劉氏青城真人知古之第道門釋種  
守律護戒子如來廣大之心達知來加持之力見虛  
空界劃縵荼壇知定慧手結金剛印過去不悟因後  
行而追福當來未聞指前緣而證道覩佛相者成一  
切智承佛光者壞無始業張說聞其事而憚之乃合  
掌西南遙禮偈曰

火雄盧舍那 妙法甚深秘 神變加持力

普昇不動位 孝乎彼沙門 愛母而錫類

法財袞妙色 空色不相異 慧日破金山

慈光觸寶地 善來金剛手 一一見佛事

般若心經贊 并序

萬行起心心人之主三乘歸一一法之宗知心無所  
得是真得見一無不通是玄通如來說五蘊皆空人  
本空也如來說諸法空相法亦空也知法照空見空  
舍法二者知見復非空也是故定與慧俱空中法立  
入此門者為明門行此路者為超路非夫行深波若

者其孰能證於此乎秘書少監駙馬都尉滎陽鄭萬  
鈞深藝之士也學有傳癖書成草堂迺揮洒手翰鐫  
刻心經樹聖善之寶坊啓未來之華葉佛以無依相  
而說法本不生我以無得心而傳今則無滅道濟文  
字意齊天壤國老張說聞而嘉焉讚揚佛事題之樂  
石 盖田法池寺二法堂贊并序

法池西三歸院二法堂茲寺長老初上禪師所造也  
禪師本姓彭俗多知至性至孝執親之喪七日不食  
復言密行志道探玄究易老莊太一之旨善正書與  
鍾王同格其精至點畫毫縷必見也折橋苛磨丈石

言文集三  
筋理洒颯固非人力所致也中朝名士山藪高尚法  
流開勝遠近暮焉及晚年專意於禪誦平生藝業若  
遺塵矣常歎曰帝王父母許我出家雨露生成恩猶  
一揆依如來教創是功德萬壹乎獻福二官潛祐七  
祖將與一切咸登道場於是三歸堂以長安元年辛  
丑子月望日癸未志立善法堂以開元元年癸丑丑  
月望日戊辰建禪師母弟仁琬弟子沙門啓疑及沙  
彌令哲左右斯業實有焉

三歸堂贊

敬告諸佛子

一心清淨觀

欲求正真道



當從信根入

是佛虛堂相

是法微妙光

定慧不相離

是僧和合義

人空法亦空

二空亦復空

住心三空寶

是名三歸處

善法堂贊

至哉初上人

建立善法堂

彩翠三世佛

莊嚴清淨眼

能運無凝心

普入於一切

見若不染色

知若不取色

是名真實見

亦名鮮脫知

佛觀離生滅

諸法等如是

益州太清觀精思院天尊贊

并序

蜀山劉尊師上清品人也兄學儒弟奉佛迺畫三聖

同在此堂煥乎有意哉達觀之一致也張說聞其風而樂之作天尊

正氣生神 結氣為實 上清尊帝 中華首出

華彩衣裳 虛無宮室 紫氣米斗 赤鑪欽日

十天從化 萬靈受禪 蓮花釋門 麟角儒術

法其不二 心同得一 道心惟微 守而勿失

并州勅造座右銘

安萬國 禮百神 放鄭聲 遠佞人

進筆硯架銘

筆硯之間 聖心必察 青蠅導教 震言漏洩

煖硯銘

筆鋒曉凍 墨池夜結 香炭潛然 推寒致熱

素盤盂銘并序

國子祭酒常公好遊山水器珍雅素因適湯泉見榎  
梓枌榆良材滿谷乃命山工作為盤盂盞罍樽解呈  
其文理素而不飾還都分遺好事者說受賴盤盂二  
事以銘之云爾

幽山之木 無心世路 器為盤盂 制以法度

匪丹匪漆 惟真惟素 理直防毀 節全思固

多用必傷 虔盈招惡 嗟嗟君子 鑒微在悟

實天是然 貽我朋故

溫泉箴

東山少連曰玄冥氏之子曰士夫安祝融氏之女曰  
丁芊俱學水仙是為溫泉之神焉帝命之救萬靈盪  
滯結腑臟達膚溱泄下人多賴之上帝是崇杵飛廉  
氏之佚女妬之常欲大恩其功故入溫泉必齋洒心  
戒以防患恕以利物含生之疾我願除妖二神嘉之  
吹湯激邪珠連漚累滴汨楊華此其効也若入溫泉  
僻心穢行惡言淫形居食失節動出躁輕二神醜之  
不匡人命飛廉佚女以裾褰人是走疰芒風瘍眩

之病夫有意之醫照合神理無恒之醫身為慾使莫  
之益傷之者至矣是以君子慎其微也

贈別楊盈川炯箴

杳杳深谷深深喬木天與之才或鮮或祿君服六藝  
道德為尊君居百里風化之源才勿驕恠政勿煩苛  
明神是福而小人無寃畏其不畏存其不存作誥之  
酒成敗之根勒銘其口禍福之門雖有韶夏勿棄繫  
轅豈無車馬敢贈一言

東山記

兵部尚書同中書門下三品修文館大學士韋公體

含真靜思協幽曠雖翊亮廊廟而緬懷數東山之  
曲有別業焉嵐氣入野榛烟出俗石潭竹岸松齊藥  
畹虹泉電射雲木虛吟惚恍疑夢間關忘術茲所謂  
丘壑夔龍衣冠曹許幸溫泉之歲也皇上聞而賞之  
過命掌舍設幣金吾劃次太官載酒奉常抱樂停輿  
輦於青靄佇輦榆於紫雲百神朝於谷口千官飲乎  
池上緹騎環山朱旆焰野縱觀空蒼途歌傳壑是日  
即席拜公逍遙公名其居曰清虛原幽棲谷景移樂  
極天子賦詩王后帝女宮嬪邦媛歌焉和焉以寵德  
也加以中宮敦序謂我諸兄引內子於重幄見兒童

於行殿家人之禮優崇棣之詩作於是實其筐筥下  
以昭忠信之獻賁其束帛上以示慈惠之恩朝野歡  
并君臣義洽夫飛翠華歷茨道至道之主也紆紫綬  
期赤松素履之輔也千載一時難乎此遇故兩曜合  
舍衆星聚德雅道光華高風允塞寒谷煦景窮崖潤  
色猗歟盛事振古未有篆之玄石貽代厥後

張說之文集卷第十三

宣統三年

開化圖書館

Kaichwa library



張說之文集卷第十四

碑

刺史義陽王碑

祈國公碑

裴公神道碑

文貞公碑

贈陳州刺史義陽王碑

昔高祖之起唐侯革隋命太宗之威四海正萬邦作  
潘帝家用建王國二十一族堯之昭也十有一宗文  
之穆也王諱琮字其文帝之孫紀王之子龍種異氣  
鳳毛秀色仁義天落德威日就學無不究故齊王之  
胤以爵推恩周公之子以才分政捻角封義陽王弱

冠拜歸州刺史又守檀州又撫沂州若敖之舊荆人  
是懲單于之衝胡馬自遠淮沂其乂邦國不空遭王  
運中微投於南海書稱大去憫失土之諸侯禮不逃  
誅義無辜之王于其年月日遘六道酷吏薨於桂林  
之野春秋五十神龍之初興廢繼絕追贈陳州刺史  
王生不得志沒受遺榮信乎才之短長不如命之豐  
約德之輕重不如藝之厚薄有矣季子豫州刺史行  
休髻髮羈孤託身炎厲猶是餘慶各歸然獨存泣血上  
請迎喪遠襲開元四年二月至桂州王同氣三人往  
偕遇禍殞殮無主封樹缺如歲月茫茫盡為野草問

憐母而失處訪樵童而莫識議者以為不可復得宜  
招魂而葬行休拊心蒼吳誓不徒還乃掃亭館設地  
席絜齋懇惻覬乎幽報遂頻夜髣像曲示其端夢魯  
王乘舟舟分為兩既而適野見東洲中斷因忽悟焉  
陰隱微明率此類也又靈堂鏤莖一夕自屈管上有  
三指凹迹一竒二並其傍鐵生文理布列成卦衆駭  
其異使善易者張法著之曰屈者於文爲尸出指者  
於義為指蹤一竒二並三殯近闊若引渦山揆之可  
以察先王之心矣考夢協卜定處尅辰以其月二十  
八日於桂城東洲發見神柩舉體咸備而一節闕焉

行休甚痛惋若自毀裂其夜又夢王告在南洛州厥  
明直舊殯而南十有九步沙洲痕下挿而得之安合  
如故他日北郭之外收併二叔父焉於是乎驗著夢  
之有徵也了了三旒連舳歸飛遙遙百越經途瞻歎  
零桂人以為羨談夫至孝潛通精魄昭應果虛無之  
見推步而有必窈冥之體尋求而致雖前誌所詳未  
有幽感反覆若斯之斯矣以某年月日陪塋於昭陵  
栢城妃汝南周氏祔焉禮也妃考曰駙馬都尉梁郡  
襄公妣曰臨川大長公主宗周玄胃大君自出左右  
圖史循環法度邦有好逌室先偕老以王之故薨於

又平到支遮匄大獲珍異首長將吏請遍觀焉有馬  
腦大盤希大寶也隨軍王休烈捧盤跌倒應時而碎  
叩頭流血惶怖請死公笑曰事有不意何至重玉而  
害人乎此又文饒之含容邴吉之仁恕也公西擒郅  
支北降伏念前後錫馬五百疋僮二百人金銀器物  
三千品錦罽織皮六百段公受置庭中旬日散盡此  
又趙奢之待士田文之市義也若夫知人以為本感  
通以為行善實以為常散積以為樂古之友道者嘗  
從事於斯矣公元夫人河南陸氏兵部侍郎爽之女  
也陸氏卒繼室以華陽夫人庫狄氏有任奴之德班

言之集古 三  
左之才聖后臨朝召入宮闈拜為御正中宗踐祚歸  
養私門歲時致禮媧后補天進叅十亂少康嗣夏退  
協三從晉朝公卿列拜虞譚之母周官音注近出帝  
逞之家皇上臨極旁求陰攻再降綸言將留內輔夫  
人深戒榮滿遠悟真筌固辭羸備起謝塵俗每讀信  
行禪師集錄永期遵奉開元五年四月二日歸真京  
邑其年八月遷窆於終南山鷓鳴堆信行禪師靈塔  
之後古不合塋魂無不之成遺志也叅互官至涇鄧  
二州刺史聿脩厥德人亡道存次子延休并州汶水  
令世載文雄家傳草聖次子慶遠協律郎深達禮樂

克掖宮庭初永昌之難王下河南獄妃錄司農寺唯  
有芳氏靡屨布衣往來供饋徒行頽色傷動人倫中  
外咨嗟目為勤孝王二子配在嵩州及六道使之用  
刑也長曰行遠以冠就戮次曰行芳以童當捨芳啼  
號抱行乞代兄命既不見聽固求同盡西南傷之稱  
為死悌君子謂勤孝者仁之厚也死悌者友之難也  
感神者誠之至也此三者有以見義陽之義方賢妃  
之內訓繼體之崇德夫如是淳羨上歸乎本朝盛烈  
延耀乎邦族安可闕而不飾碑版無文而已哉銘曰  
高丘白雲維堯大理函合紫氣維周柱史百代福流

千齡運起富有海內貴為天子聖帝才子於穆紀王  
 賢王作胤倬哉義陽慎徽九德九德有常允釐三郡  
 三郡以康明夷于飛丹崖之下梁木其壞桂林之野  
 不識阡陌無存松檟于以求之人無知者哀哀孝子  
 眷眷靈夢語妙常閤文微孰仲南洛占從東洲億中  
 舊安移禩新棺改贈既克返葬以祚山陵卜云其吉  
 神心允憑人非地是迹謝名稱青青松栢不顯不承

祈國公碑奉 勅撰

維天命帝子萬邦維坤配乾母萬物以親九族后父  
 之屬尊以叙百官開府之班取執謙德而光重地者



則祈國公其人也公諱仁皎字鳴鶴太原祈人王子  
賓天啓靈仙之族司徒衛漢大忠義之門盛德之後  
仁賢繼出曾祖景孝隋屯田侍郎祖詮歙縣男贈汾  
州刺史考文洎贈右僕射續戎前列啓迪後人公之  
生也膺汾霍之禎體敦龐之度禮樂徃於代襲忠孝  
萌於自然克寬克恭不激不傲鑒窮未兆而養之以  
蒙智周無際而處之以默故質勝文行過於譽其於  
隱德也三年不鳴其會時也一日千里初以翊衛調  
同州叅軍換晉州司兵應將帥舉授甘泉府毅遷左  
衛中郎將上昇春宮后正妃壺擢將作大匠事時符

工練八材孔脩轉太僕正卿騶訓車攻六飛如舞先  
天內禪引伸外戚懷柔畏滿厭劇思閑公既深辭以  
職事上亦優之以散秩加特進禮異群公拜開府儀  
同三司策上柱國封祁國公邑戶三千實賦三百公  
於是寓情宴喜簡跡朝行入告嘉猷密而人莫窺也  
陰薦多士晦而人莫知也不自異於當路每同塵於  
衆流常語所親曰明明天子擇賢共理瓌瓌姻婭則  
無膺仕不識不知樂我而已善矣夫人臣位極遇莫  
大焉王曰外舅尊莫重焉而能明道若昧進道若退  
事不事而縣解為不為而理會一以無目牛之全一

以無亢龍之悔所謂言合古行中權歟後之人慎終  
始而保福祿者固將江通波而蹈高軌也享年六十  
有九開元七年四月戊寅薨於京師皇上悼焉設次  
大臨輟朝累日榮之以華衮寵之以文飾終追贈太  
尉益州大都督賜東國秘器唘榼贈錫率加常禮乃  
命尚書彭城劉知柔攝大鴻臚俾之監護京兆少尹  
崔琬介焉申命詹事南安侯龐承宗持節弔祭左庶  
子自知慎倅焉公鄉命士更弔迭喻溢巷填街為之  
編素粵以十月初吉塋昭宣公群官執綍祖奠國門  
如前會夫天作聖合必起大邦故軒妃羨於西陵周

婦表於東海公藩衍之慶祚徹二十或哲或謀或肅  
或艾求錫之類也如是元女祥發望雲業叅練石內  
被螽斯之德外偃關雎之化門風之至也如彼長子  
惟力戴君畢心禦侮奉雲雷之會懸日月之功庭訓  
之致也如此高陽有才子八族我盈其二武王有理  
臣十人家出其兩稽諸舊史罕或前聞若乃積三盛  
事而重之以純德篆于金石垂于億萬宜哉其文字  
光華撰錄知旨要則皇帝所為也詞臣奉詔作之其  
銘曰

於穆祁公

誕靈信厚

有倬其慶

天之外舅

高以卑牧 盈將冲守 忠焉孝乎 沒而不朽  
人之忠孝 其德不回 天俾純嘏 大福時來  
責踰九列 榮並三台 祚之玄社 帝曰欽哉  
祁公之德 柔嘉維則 令儀令色 小心翼翼  
如何昊天 喪此邦式 休問其永 豐石是刻  
我思肥泉 孝心罔極

贈太尉裴公神道碑

星辰懸象所以殷時布氣然而行不言之道者天也  
文武用才所以勤官定國然而致無為之理者帝也  
當高宗之休運任名世之良臣清九流而闢四海代

天工而張帝德歷選前哲豈多乎哉公諱行儉字約  
河東聞喜人也其先出乎嬴姓伯翳之後也秦則裴  
侯始封漢則侍中受職魏晉之代爵為盛門八裴方  
於八王聲振海內祖三望高士族自冀三子尊為州  
刺史徽至公六葉代無違德不隕厥問者已大王父  
伯鳳周驃騎大將軍光汾二州刺史琅耶郡開國公  
大父定高大將軍馮翊郡守襲琅耶郡公諸侯受封  
山河傳國天子共理循良克家考仁基隋左光祿大  
夫以陰圖王充仗義舊主遭時不利王折名場聖唐  
龍興旌淑勸節贈原州都督命謚曰忠蓋春秋之褒

也公清明本乎世德正性出乎胎教氣潤河靈貌雄  
岳立仁孝之道天生而知將相之器與年俱長以高  
蔭為弘文生絕事篤學累年不舉房僕射異而問焉  
對曰隋室喪亂家乏典籍館有良書探討未遍故少  
留耳梁公驚曰驥子志氣凌雲當一日千里其早為  
通人之目也如是明經補左屯衛倉曹詔舉轉雍州  
司士遷金部戶部二員外曆都官郎中長安令明慶  
中與長孫太尉褚河南論及中宮廢立國家憂患有  
公伯寮譜行於季氏出為西州史又改金山副都護  
又拜安西大都護西域從政七年間窮荒舉落重譯

向化我之獨賢邊之多幸乾封歲徵為同文少卿尋  
除司列少常伯官復舊號為吏部侍郎加銀青光祿  
大夫自居銓管大設網綜辨職羗才審官序爵法著  
新格言成故事上元中長星出天禿髮入塞詔公為  
洮州道左軍總管又為秦州鎮撫右軍總管並受元  
帥周王節度雖祭公有諫耀武之事不行而方叔帥  
師來威之道備矣儀鳳二年十姓可汗匍延都支李  
遮匍潛構大戎倣擾西域朝廷憑怒將行人討公進  
議曰敬互敗績於茅戎審禮免冒而入狄豈可絕域  
更勸王師今波斯王亡侍子在此若命使冊立即路



由二蕃便宜取之是成禽也高祖善其計詔公以名  
冊送波斯兼安撫太食公往蒞遺愛治於人心是行  
也百城故老望塵而雅拜四鎮酋渠連營而諮酒一  
言召募萬騎雲集公乃解嚴以反謀託獵以訓旅誤  
之多方聞其無備裹糧十日執都支於帳前破竹一  
呼鉗遮匄於麾下華戎相慶立碑碎葉蓋美克雋不  
殺而用謀安人以德而去害廓氣授於地表輝皇靈  
於天外充國有屯田之頌實憲有燕山之銘詢茲遠  
略彼何微也遷禮部尚書加上柱國又特降恩命兼  
右衛大將軍夷典秩宗神必據我文昌有將天道存

馬調露中單于可汗伏念外叛大鴻臚蕭嗣業喪律  
詔公為定襄道大總管軍至朔州斥候相接匈奴故  
態徂劫糧以餒師神將出奇張虛勢以陷敵乃偽為  
轉運伏其壯士示羸師以隱行接精騎以躡迹寇果  
大下援兵奔散驕虜益驚自為得色駘此車牛憇彼  
泉井於是箱中兵起千弩齊發要路騎飛一息而至  
群胡顛沛殺傷滿野從茲饋軍路無驚者觀夫大漠  
無睨穹廬靡所追之逃遯捨之憑凌費日老師兵家  
陰送降狀公密上其事人莫知之及其期舉國歸  
附煙塵大起師徒惶惑公徐使令軍曰此是伏念執

溫傳來降非他寇也俄而銜壁轅門釋縛納欵帝嘉厥勲命尚書崔知悌乘駟勞軍備禮獻凱策勲定日程務挺張虔勗者行軍之偏將世訴言子營逼逐方降大軍文屬秉鈞忌才下上其手公曰雖不逮群師之讓力猶耻二王之競功今而殺降後無來者乃封開喜縣開國公而伏念溫傳皆戮都市是羊也伏念弟元珍權其餘種後叛則天稱制追正宿枉贈伏念太僕卿程張諸家別故夷族君子以為神理之不可誣也永淳元年詔公為金牙道大摠管未行遘疾四月二十八日薨於京師延壽里春秋六十有四長子

貞隱早卒嫡孫叅互嗣封藐視諸孤哀哀童幼高宗  
悼焉贈幽州都督賜凶儀還鄉喪葬官供禮部郎中  
監護窀穸之數率禮有加別勅留守委皇太子擇六  
品京官一人檢校家事五六年間待兒孫稍成長日  
停寵極哀榮禮之厚者澤及存沒義莫重焉太常議  
謚博古多能文武表式曰憲其十月葬我憲公於聞  
喜之東良原禮也神龍中興朝思舊德贈公揚州大  
都督開元孝享宰嗣延恩贈公太尉生不登乎台階  
沒追位乎靈宰序四時於下地調二光於上天聖人  
神教意在茲乎公志堅慮精神勇識澈藝必討本學

皆覩奧又善測候雲物推步氣象鬼無遜謀靈不藏  
用著文集二十卷造草字數千文皆寶傳人間以為  
世法又撰譜選十卷又為運營行陣部衆料敵等三  
十六訣大聖天后令祕書監武承嗣就家收進以為  
祕術豈比馬卿浮華唯留封禪之草劉安虛誕空傳  
鳴寶之書而已哉加以汲引沉淪推獎氣類虛懷而  
襟帶不設弘亮而藏府洞開故虎旅雲從詞林響應  
若毛羽之崇麟鳳衆川之長江河也在選曹見駱賓  
王盧照隣王勃楊炯評曰炯雖有才名不過令長其  
餘華而不實鮮克令終見蘇味道王劇歎曰十數年

外當居衡石後各如其言其在軍麾擇帳下之士則  
有張知運薛訥閻敬客甘元陳裴思諒王智方呂休  
璟劉玄意引偏裨之將則有程務挺張勗王方翼崔  
智瓘党金毗郭待封等凡所進拔盡為名將此則有  
道之人倫武侯之賞監也公之送波斯也入莫賀延  
磧中遇風沙大起天地冥晦引導皆迷公因命息徒  
至誠虔禱徇於衆曰井泉不遠湏臾風止氛開有香  
泉豐草宛在后側後來之人莫知其處此乃耿恭之  
營拜井商人之化城也公在禮闈勅賜善馬及寶鞍  
令史奔馳馬倒鞍破懼而逃罪公使召之曰知汝誤

耳和神人咸負長才同淪短運季子光庭侍中兼吏部尚書輔政邕熙致君堯舜孝理發乎陵廟仁澤遍乎松楸是故妻以夫榮母以子貴尚書先贈方伯申命上公夫人舊封華陽增號晉國詩云文武吉甫萬邦之憲上公有焉又曰彼美孟姜德音不忘小君有焉孝經云立身行道以顯父母侍中有焉合三德而為家橫百世而濟美信可以言時稱代鏤石刊金者歟神道前銘薛令所撰且有後命俾余係述馬遷世家益孟堅之一傳劉寬表基並伯喈之兩碑報德教忠俱傳不朽銘曰

天生亞聖 祚比王國 文綜九流 武參七德

柔遠服叛 窮西盡北 赫我皇靈 去其蝨賊

仁則不遠 智何不周 如山之峻 如川之流

術與神合 藝將道遊 書來懸帳 賦出登樓

司馬軍陣 宮人網紀 帝嘉常伯 國于聞喜

室其令妻 家成克子 社金傳世 桓珪守祀

神為上台 永介邦社

故開府儀同三司上柱國贈揚州刺史大都

督梁國文貞公碑奉 勅撰

叙曰八柱承天高明之位定四時成歲亭育之功存



畫為九州禹也堯享鳴名播時百穀棄也舜稱至德  
由此言之知人則哲非賢罔乂致君堯舜何代無人  
有唐元宰曰梁文貞公者位為帝之四輔才為國之  
六翮言為代之軌物行為人之師表蓋維嶽降神應  
時間出者也公諱崇字元之姚姓有虞之後遠自吳  
興近徙于陝今家洛陽焉烈考長沙文獻公樹勲王  
室建旟舊府公紈綺而孤克廣前業激昂成學榮問  
日流武庫則矛戟森然文房則禮樂盡在弱冠補孝  
敬褫郎又制舉高第歷佐濮鄭並有聲華入為司刑  
承天授之際獄吏峻密公持法無頗全活者衆進夏

官員外郎中侍郎朝庭曰能遂掌軍國遷鳳閣侍郎監脩國史始則天人讓王承置醴之顧終以飛龍利見延驂乘之恩自時厥後恒當大任凡三處兵部尚書三入中書令一為禮部尚書左庶子又肅政大夫揔虛武軍兵馬又司僕卿知隴右監牧使出典毫宋常越許申徐潞揚同十郡景雲初以蕃邸舊寮封梁國公食賦百室公性仁恕行簡易虛懷況愛而涇渭不雜真率徑盡而應變無窮亦推是心以御於物故所蒞必甦庶風偃鷲浪化從言不勵而教成政不威而事理去思覩頌來暮聞歌既登邦政卒乘輯睦

及在宗伯神人允諧今之中書是為理本謀事兼於  
百揆論道摠於三台公執國之鈞金玉王度大渾順  
序休徵來臻懋德格天名遂身遜拜開府儀同三司  
崇其秩逸其志也初太夫人在堂公授任西掖頗限  
局禁求待晨昏優詔既許尋令還職公固請以泣制  
曰家有令弟足慰母心國有諫臣安可暫闕其後剖  
符江表敦喻起復衰麻外墨纒棘內毀變禮中權通  
識所貴神龍之首與聞興復疇其并賦累讓而停夫  
以革故鼎新大來小往得喪而不刑於色進退而不  
失其正者鮮矣君子曰忠不忘親仁也哀不違事義

也讓功辭邑禮也濟代全名智也仁以長人義以和  
下禮以安上智以周身宜其光輔四帝軒冕三紀池  
臺琴筑優游暮齒傳爵土於祚胤保祿位於始終矣  
享年七十有一開元九年九月寢疾薨東都之慈惠  
里皇上悼焉國人慕焉撫床輟春曾未云比制贈楊  
州大都督謚曰文貞禮也十年二月葬於萬安山之  
南原在疾也王人賜膳御藥視醫于薨也中使弔臨  
羽儀哀送君臣之義厚莫重焉子异奔思綴遺美以  
寘罔極有詔掌文之官叙事盛德之老銘功將以寵  
宗臣楊英烈帝乃洒恩仙翰鏤澤豐砥日月照臨於

佳城煙雲變態於神道寶其文字別為群玉之山禁  
其樵蘇即表三司之墓銘曰

源深自虞 派別從吳 避地魯陝 居家洛都

神明遠契 兵瀆冥符 翊聖斯偶 生賢不孤

仁將勇濟 孝與忠俱 學仞檟植 文鋒迅驅

統安卑位 即騁長途 唯實唯有 若虛若無

再三軍國 一二訐謨 戎柄忝重 王綸最樞

兼司任切 久政榮殊 黼藻彌煥 丹青靡渝

以寬容物 以鑒分區 外或形放 中恒禮拘

箴雖緘口 諍亦志軀 但覩渾璞 誰詳瑾瑜

伊咎尺寸

管樂錙銖

名正身遂

言誠願孚

方辭漢祿

更辱齊狙

既積而散

窮歡盡娛

川歸東極

日止西晡

上側旒宸

旁悲路衢

藍田羨玉

荔浦明珠

載廣休慶

爰彌典謨

豐碑乃立

盛業其鋪

帝念頻軫

仙毫特紆

鑄金刻石

鳳篆龍圖

七耀光動

三泉澤濡

鈐能叙事

理鬱詞敷

求舊銘實

慙殫而蕪

緬思雲霧

尚想江湖

有道之德

其何以踰

延陵之墓

空此嗚呼

存歿終始

遐哉邈乎

故太子少傅蘇公碑銘

盧藏用撰序不錄

故太子少傅蘇公碑銘 盧藏用撰序不錄

斤斤蘇公 體正含道 稟靈淳粹 為唐元老

忠以衛主 孝以立身 文以經國 惠以安人

司牧九郡 九郡爰靜 平章百工 百工爰整

千載典憲 三朝綱領 上纂先人 五代相國

下垂餘慶 七子令德 帝謂庭碩 伊公是似

接待玉墀 序拜金所 聯華疊潤 佐我天子

於戲彼蒼 國幹云亡 地頽五嶽 天折三光

備禮詔葬 群官會喪 掌史司德 刊銘路磅

張說之文集卷第十四

開化圖書館

kaikwa library



張說之文集卷第十五

表

請封太山表

請為千秋節表

請置屯田表

禮儀使賀祥瑞表

賀太陽不虧表

賀大衍曆表

請許王公百官封太山表

并批答

臣說等言臣聞聖人者與天地合德故珍符休命不可得而辭鴻名盛典不可得而讓陛下功格上天澤流厚載三五之盛莫能比崇登封告成理協幽贊故符瑞必臻天意也書軌大同人事也菽粟屢登和平

也刑罰不用至理也今陛下稽天意以固辭違人事  
以久讓是和平而不崇昭報至理而闕薦祖宗億兆  
之情猶知不可况上帝臨照祖宗顧諟其可止乎願  
納不勝懇禱敢昧死再拜

朕以眇身欽承丕業十餘載矣夙夜兢兢常以至道  
未暢元元未安上累先聖之心下受萬方之責何敢  
議封禪躡岱宗乎今群官所奏靈符歲稔戎狄向風  
蓋上天降休宗廟垂福豈朕薄德冒以當仁然天休  
不敢不答廟祐不敢不報王公衆望不可固違將以  
蒙福謝誠非以成功類帝輒用忘忌祇遂群心

請八月五日為千秋節表并教旨

左丞相臣說右丞相臣璟等言臣聞聖人出則日月  
記其初王澤深則風俗傳其後故少昊著流虹之感  
商湯本玄鳥之命孟夏有佛生之供仲春脩道祖之  
籙追始尋源其義一也伏惟開元神武皇帝陛下二  
氣含神九龍浴聖清明摠於玉靈爽朗冠於金天月  
惟仲秋日在端五恒星不見之夜祥光照室之朝群  
臣相賀誕聖之辰也焉可不以為嘉節乎比夫曲水  
楔亭重陽射圃五日絲緹七夕粉筵豈同年而語也  
臣不勝大願以八月五日為千秋節著之甲令布於

四方群臣以是日獻甘露醇酎上萬歲壽酒王公戚  
里進金鏡綏帶士庶以結絲承露囊更相遺問村社  
作壽酒宴樂名賽白帝報田神上明玄天光啓大聖  
下彰皇化垂裕無窮異域占風同見羨俗勅旨凡是  
節日或以天氣推移或因人事表紀八月五日是朕  
生辰感先聖之慶靈荷皇天之眷命卿等請為令節  
上獻嘉名勝地良遊清秋高興百穀豐熟萬實已成  
自我作古舉無越禮朝野同歡足為美事依卿來請  
宜付所司

請置屯田表

臣說言臣聞求人安者莫過於足食求國富者莫先  
於疾耕臣再任河北備知川澤竊見漳水可以灌巨  
野淇水可以溉湯陰若開屯田不減萬頃化荏苒爲  
秔稻變斥鹵爲膏腴用力非多爲利甚博諺云歲在  
申酉乞漿得酒來歲甫爾春事方興碩墜下不失天  
時急趁地利上可以豐國下可以廩邊河漕通流易  
於轉運此百代之利也當今國儲未息靜人業農碩  
留聖意亦嘗賜前階之食承後騎之碩竟唯唯而無  
一言者豈敢隱情於聖主也正以職在仗衛憂於部  
五馬上非公議之所囿遊非朝廷之事今昧死上愚

見乞大臣籌謀速下河北支度及溝渠使檢料施功  
不後農節謹奉表以聞謹言

禮儀使賀五陵祥瑞表

并奉制

右臣等伏以陛下孝通天地親朝五陵拜橋陵則紫  
氣見獲白兔甘露降白鵠巢天光清和日色明朗拜  
定陵則有景雲見甘露降拜獻陵則甘露被樹祥雲  
抱日拜昭陵則先聖見於神遊薦享之際陛下親聞  
刻息初進服用樂器自然發聲又素像迴甘露降滋  
從祀先臣歷聞蹈舞拜乾陵則有靈草生甘露降日  
抱戴之瑞此皆陛下虔誠上感神靈福降四海同歡

抱戴之瑞此皆陛下虔誠上感神靈福降四海同歡

萬方抃躍臣等幸陪大禮親覩禎祥無任大慶之至  
謹奉表陳賀以聞臣說謹言

朝拜園陵罄申精到深懼虛昧未感靈心今嘉瑞來  
臻神無譴怒欽承祥祉兢慶兼懷儒林史官當貴朝  
典 集賢院賀太陽不虧表并荅制

大史奏太陽不虧聖德上感變災為瑞陽光增暉陰  
慝不作休徵之美莫盛於斯臣等無任欣抃之至謹  
進狀陳賀以聞謹進

彼日而蝕詩人所醜應虧不變轉異為臧未知天意  
降休將或疇人未洽媿無一言之善而同三舍之慶

循省來章用增勵惕

賀大衍曆表

臣說言伏以開元大衍曆天旨裁其紀綱日官考其  
精要履端更始敬授惟新加以辨五行之序推七精  
之數明徵聖期實光士德臣又見梁天監中陶弘景  
著玉匱記云盛德木子以肇來運頃者僧一行璿衡  
曆得皇家天命成數千年古今祥兆若合符契曆數  
既在於聖躬卜年又表於長曆莫大之慶獨冠前王  
臣忝跡儒林預聞昌運無任抃躍之至謹奉表陳賀  
以聞



張說之文集卷第十六

碑銘

王公神道碑

安公碑銘

冉府君神道碑

華州楊君碑

馮府君神道碑

唐故夏州都督太原王公神道碑

良玉禮神用之西序之器捨之南山之璞罔然不有其珍也君子安命進之扞城之雄退之去國之老墮然不失其正也語夫伏運以行道屬辭以比德亦何代無其人哉公諱方翼字仲翔太原祁人王周之後

也王子以敗狄受姓徵君以遯世為名司徒之濟艱  
難義形漢室太尉之圖舉中心盡魏朝聞蔣濟所言  
則知尚書志力兄弟繼美覽周書所載則見潁川忠  
烈子姪皆封臣節奮揚於百代家聲藉甚於四海大  
王父司徒定公秉隋氏之崇也王父駙馬開府文公  
裕光朝之懿也考特進慎公仁表皇室之甥也公門  
摠四岳之靈帝子分五潢之氣是生時傑鬱為仁紀  
公雄姿沉毅凜難犯之色虛懷信厚坦招納之量識  
略精斷達應變之權神守密靜堅不奪之節孝友內  
地於免懷忠敬外灼於旣冠加以思參造化誠合鬼

地於免懷忠敬外灼於旣冠加以思參造化誠合鬼

神文其詩書武其韜志推此才也以從政焉求無匱  
矣夙遭家艱哀過柴席京師號曰孝童王母同安長  
公主引貴遊之誠示其善端今太夫人徙居郿墅儲  
無斗粟庇無尺椽公躬率庸保肆勤給養懇山出田  
燎松鬻墨一年而良疇千畝二年而厦屋百間三年  
則日舉壽觴厭珍膳矣處約能久不亦仁乎在困能  
亨不亦智乎永徽初始宰安定誅豪暴以育人察姦  
寬以申鬼異政三舉清風一變除澣海都護府司馬  
以母疾辭職為姜恪乘便遂徙朔州尚德府果毅歲  
餘王本立上書理公國之悖老不宜擯抑有詔徵還

而親不待心與哀絕氣屬禮存詔御醫孟默朝夕詠  
視免喪逾年僅堪履立樂成公東討新羅薦為將帥  
詔公持節雞林道摠管軍停不行授沙州刺史未至  
改拜肅州以為慢防啓寇非重閉也乃大築雉堞嚴  
備櫓械人知有恃戎亦來威儀鳳歲河西盡蝗獨不  
入境隣郡湊稔提挈如雲公傾私泉以資之引激水  
以立礎舉火百竈日舖千人遂有芝草藪生豐年屢  
降人之詠德刊石存焉裴吏部名立波斯實取遮畝  
偉公為波斯軍副使兼安西都護以都護杜懷寶為  
庭州刺史公城碎葉街郭迴互夷夏縱觀莫究端倪

三十六蕃承風謁賀自汨汗海東肅如也無何詔公  
為庭州刺史以波斯使領金山都護前使杜懷寶更  
統安西鎮守碎葉朝廷始以鎮不寧蕃故授公代寶  
又以求不失鎮復命寶代公夫然有以見諸蕃之心  
摧矣於是車薄歎百唱寇兵群蕃響應蝟毛而豎公  
在磧西捷無虛歲蹙車薄於弓月陷咽麵於熱海剿  
叛徒三千於麾下走烏鶻十萬於域外皆以少復衆  
以誠動天葛水暴長祭徹而三年涉渡葉河無舟兵  
叩而七月水合由是士卒益勇戎狄益懼重書下問  
皇靈遠燦遷夏州都督徵詣奉天宮熱海之後流天

貫臂陣血染袖事等殷輪帝顧而問之視瘡歎歎曰  
為國致身乃吾親也妖賊白鐵予據城平以反奉詔  
與程務挺討擒之善公有發石壞城之計反風焚柵  
之感封太原郡公元珍寇邊受命討擊公以無甲乃  
發思造六片木排枹開鈕解合畫為虎文北至開光  
與虜合戰若駟猛獸蒙臯比之莫敵也故馬奔駭獲  
其二啜桑乾舍利兩部來降初公善書與魏叔琬相  
鞏工射與趙持滿齊名帝每矚之賜比鳴輦賞深懸  
帳嘗獨行入夜有怪人長丈直來趣逼射而仆焉乃  
朽木也太宗壯之授右千牛及持滿伏法暴骸公哀

而收塗為執金吾奏劾高宗義之釋而不罪履道坦  
坦多如此類適將任帝夔龍為國方虎天下膏潤群  
生雲雨惜哉不辰悄焉邁悔嗣聖之際太后臨朝有  
凶人誣奏公廢后從兄常懷怏怏司刑御史侮文矯  
制不名苛法遷於崖州路至衡山寢疾捐館春秋六  
十有三垂拱三年閏正月十九日葬于咸陽原君子  
曰斯才也斯望也難乎免于斯之代也周公聖而謗  
屈平賢而放賈誼才而謫李廣勞而喪彼天命之紜  
紛此人情之惆悵神龍中興以陷酷吏例復官爵孝  
為人極忠為令德神之聽之始枉終直信矣有子故

光祿少卿璵今祕書監珣皆篤行純孝慎終思遠說  
少也蒙會友昇堂今老矣豈能文旌墓遷可漢籍感  
激論都尉之書邕叙彪情追美樹楊公之碣銘曰

上德惟公 氣秀才傑 孝弘世美 忠廣前列

日月心照 江河思決 難地必通 暗機先徹

卓犖文藝 崢嶸武節 歎由宰邑 借恂臨郡

海女避途 山地可問 師律三摠 軍聲六振

銳氣入營 長雲出陣 肅將國威 烜赫天外

玉弩方擊 雲旗卷旆 天道茫茫 自古多傷

功存西域 身棄南荒 易篲中路 懸棺反歲



寶刀主衣 玉玦無光 後有才子 先賢不忘

河西節度副大使安公碑銘 并序

公諱忠敬字某武威人也軒轅帝孫降居弱水安息  
王子以國為姓世高之遠漢季自河南而適遼東高  
陽之受魏封由陰山而宅涼土高陽王同生尚書左  
僕射河間公原晤真河間生建節將軍西平公纘從  
正西平生龍驤將軍黃門侍郎廣宗侯薛晤微累葉  
動華載於魏史高祖何葺器廣宗之子也周開府儀  
同三司寧遠將軍肅州刺史張掖郡公曾祖羅方大  
隋開府儀同三司皇朝贈石州刺史貴鄉公祖興貴

右武侯大將軍涼州刺史徙封榮涼歸三國公考文  
生不仕涼公皇運經綸首平李軌大舉河隍之地遠  
通城郭之國寵錫蕃庶冠絕等彝水出渥洼之神文  
馬者二千乘山得崆峒之武朱輪者四十人公育榮  
盛之門鬱豪爽之氣孝友天至清華玉立幼聚童兒  
必為軍陣之戲長交莫俊唯談韻略之書始以良家  
子僕射常公待價引於帳不安息軍建奇績解褐授  
游擊將軍臨洮府右果毅復以善部統御史大夫唐  
公休璟處之前鋒洪源谷立異効遷右威衛翊府右  
即將兼新泉軍使進本衛中即將赤水軍副使兼赤

水新泉兩軍監牧使改會州刺史營田使攘松州都  
督防禦使遷左司禦率兼河西節度副大使臨洮軍  
使轉鄯州都督使如故其在軍州傾心下士視人如  
子無約而親附不言而條理其在農牧大田多稼如  
茨如梁思馬斯才有驕有皇輸力四朝歷官三紀名  
叅禁衛身任壇塲以靜揔繁以逸待寇我無亡鐵之  
費敵有不戰之屈咨所謂一方之干城者也享年六  
十有六開元十四年十一月二十八日寢疾終位知  
與不知莫不隕涕十五年某月葬於烏城之南志公  
鄉祔先塋也公寬以御衆卑以自牧直而無訐廉而

無劇朋友不聞臧否之言家人不見喜愠之色加以  
心淨三業躬勤八戒推是而不行何往不濟初甘州  
有舍利沙多禪師道場之四果也嘗云檀越德充於  
內神護於外雖冒鋒鏑永無害也及百戰之後啓手  
歸全西州士人聞之激厲有子仲璋如璋季璋全璋  
重璋庭襲芝蘭喪過藥棘敬奉窀穸備禮儀於文武  
撰述家風刻功名於金石詞曰

玉関氣爽

金波秋澈

涼野蕭條

寒山積雪

授靈產義

精勁才傑

孝固純深

忠惟剛烈

負羽從軍

奮飛青雲

麾幢按部

惠流時雨

揔軍挾郡 入文出武 三十年間 式遏戎虜

壇場務靜 非公莫鎮 金鼓氣雄 非公莫震

神山與鉞 龍池取駿 霹靂陷營 衝風入陣

勇將知時 仁兵善持 反耕去戰 王者之師

牧馬如雲 屯庾如坻 西軍方壯 東首長辭

振古同嗟 沒而不死

河州刺史舟府君神道碑

昔者堯舜既沒文武將墜天縱孔聖誕敷皇極於是  
乎恢六藝而正王道舉十哲而闡微言雍也為德行

之目求也為政事之首吾見乎龍翰鳳鷁百世而共  
貫虎符犀節重世而增華明德之後知其必大公諱  
寔字茂實其魯國鄒人也古天子有相氏宅干相土  
實曰冉姓蓋氏族之興舊矣不常厥所今為河南人  
焉五代祖睢陽公諱道周尚齊南康公主位平南將  
軍散騎常侍荊州刺史信州都督高祖軫仕梁太子  
左內率荊州刺史齊梁之間荆巫重鎮世善其職江  
漢宜之大曾父義城公黎在梁雲麾將軍湖州刺史  
入周拜驃騎開府儀同至隋開皇中為旭州刺史大  
父黃國柱公諱安昌隋啓平城祚之毅璧唐分蜀國

瑞以桓珪其後改封於黃授信州刺史歷潭州摠管  
贈夔州都督烈考天水郡果公諱仁才秩金紫光祿  
大夫婚皇室漢南縣主經浦灑袁江陵永夙六州刺  
史偉矣哉承家善慶歷代名臣風流載於史官勲業  
載於王府公果公季子天王自出內稟胎教混成之  
姿外被門風式瞻之訓從容合度造次皆法生而知  
之孝弟也學而知之禮樂也德義如山文章如泉搢  
紳之士仰焉宗焉弱冠文學生進士擢第遭家不造  
府君捕舘五日絕漿三年泣血雖麻葛就禮而樂棘  
加人服闋調并州大都督府叅軍事丁太夫人憂過

哀終喪有如前制應八科舉策問高第授綿州司戶  
參軍轉揚州都府倉曹參軍又舉四科敷言簡帝除  
益州導江縣令鴻漸二鎮翰飛三蜀府中之孫子荆  
郡內之岑公孝用能據淮距海我庾如坻岷山導江  
入境先歎加朝散大夫除鄜州長史仍加關內道支  
度使去青城之洞府來白帝之鄜祠命服有輝使車  
何重除婺州可馬入謝于武成殿王上以邊庭有事  
喜問陳湯宣室清言思逢賈誼公召對蘊籍謀慮深  
長眷甚前席恩加後命因改恒州長史于時四鎮未  
復二蕃猶梗屯田遼塞戎馬生郊代郡藏符臨冀北



而誠重漢家張掖比西河而還輕乃徙拜涼州都督  
府長史仍知赤水軍兵馬河西諸軍支度使他壯伏  
龍城雄飛鳥位居半刺史總管邊公乃利溝洫懋麓  
裘序莢藁積糗糧均轉輸程力役寬御悅使授方任  
能人胥忘其久勞兵不遠其長道雖金方氣映雨雪  
不交之地磧路沙霍草木不植之所莫不盡滌穗於  
垆牧厭甘瓜於戍時朝廷賴之遷使持節河州刺史  
仍營田使崆峒連五郡之壤磧石控九河之源公夙  
奉皇華政聞行露高車木至闔境相歡既見君子溫  
其如玉率性仁愛由衷易簡推是心也物感斯應觀

恭肅而無競見禮義而與行不言而庶事熙非教而  
郡下順故得大田多稼人和歲豐餉軍廩師處勤餘  
裕計偕入朝侍宴於長壽殿上謂公曰河州軍鎮要  
衝屯田最多卿以足食為心朕無西顧之憂侑以彩  
幣錫以文袞及公還州也璽書勞勉王人相繼國家  
徑流沙梁弱水收西域護南庭連百萬之兵以濟事  
於外不一日而乏者則公之力也無駭入極可謂費  
夸文勝之社預平吳蓋知羊叔子功爾宜登元老作  
貳天朝止干邊股實孤人均享享年七十有一證聖元  
年一月十日寢疾終於官舍天子悼焉凶費喪歸悉

命官給是日河隍耆老山谷羗夷反首斃面號奔州  
邑雖國亡子產吏哭蔡遵豈云過也愷悌之化人之  
父母及其沒也哀亦如之信矣太夫人金城郡君隴  
西李氏江夏王道宗之女也宜此象服爛其盈門嗣  
先姑之徽音立庶姬之範則薜華前落藁蔭城隅以  
證聖二年正月合葬於河南定鼎原禮也天使馬悲  
落滕公之室人看鶴舞閉王母之墳松栢接於邛山  
丘陵對於伊闕石廊將鬪華表何年有子曰祖雍景  
龍初擢給事中義侍御史內供奉追惟皇考孝于奉  
親忠于事君恭于立身惠于臨人總是四行旁通具

羨貽厥孫謀以宴翼子故老之口既絕竹帛之文又  
滅揚名兮柰何刊石兮來裔其詞曰

倬哉舟氏 世有仲弓 鐵冠繡服 給事于中

克昭遺懿 樹之家風 於皇嚴考 高明有融

德罔不尊 藝何不涉 嗣武先正 思文載協

建旗千里 逮君六葉 龜顧印房 虵盤綬篋

官以勤積 業因時峻 宰號神明 掾稱親信

驥足既展 熊軒亦軻 邦國海康 京師河潤

出車西域 我君謀之 屯田北假 我君獲之

六軍有饋 其誰度之 一人無憂 其誰樂之

猛獸避德

均遷所莅

靈鳥依仁

霸昇執事

以今視古

名齊績類

天不慙遺

山頽此位

隴首迴望

秦川斷腸

吏人攀綽

哀鴈隨喪

虛靈冀野

行臨惟堂

廟立邊郡

魂歸故鄉

王姬祔塋

禮之終也

水合蛟龍

墳同石馬

地積霜露

烟攢松檟

千載九原

高碑淚下

贈華州刺史楊君碑

公諱至誠字某弘農華陰人也厥初生人為姬伯之

祖同邑命氏有楊侯之胤其後東陵奮而開國西漢

盛而移關門廬隱隱且連桃塞之上碑闕崑崙蔽滿

華山之下明德之後士有人焉大王父隋直閣將軍  
岷蔚撫豪道五州刺史刑國公諱貴大父故古衛副  
率慈汾二州刺史

靜公諱

譽考故常州刺史工部待郎鳴臚卿金紫光祿大夫  
散騎常侍太子少師贈儀同三司上柱國鄭國懿公  
諱崇敬若夫家聲代業累德積仁故以克隆前統光  
啓來葉矣公稟純嘏之粹靈漸軌物之名教端操以  
正已崇讓以與人勵精以探道善問以毓德學無不  
達藝無不周成童有傾矚之望既冠為宗匠之表率  
十三調太常挽郎尋補潞王典籤大夫門子執紼橋

山王國詞人曳裾睢苑皆一時之選也明慶中詔郡  
國舉賢良公對策天朝無能出其右者遷太子通事  
舍人再舉高第徙國子監丞坊監清流才地兼擇東  
朝東帶銀榜增華西序漂纓環林益閨高宗接千歲  
之統嗣百王之業封岱岳禪云亭稽子舊章俟茲通  
傳乃徐公禮部員外郎祀事克明大典攸序建邦分  
賦得人者昌吏曹居六官之首求郎盡一臺之妙又  
轉公吏部員外郎准的文昌羽儀冊地丁太夫人憂  
去職公至行純篤幾於滅性雖杖經外除而柴瘠加  
等門人記其喪禮天子憂其死孝服常授幽州三水

令曳尚方之舄鳴單父之琴志道不矜其大才勤政  
無陋其小邑羨聲沉於幽籥惠化匝於周原又應文  
擅詞場舉策試天下第一陳聖謨啓沃明主究天人  
之際建皇道之極如有用我者其為東周乎朝廷納  
賈生之言排汲直於外拜公隴州司馬未及赴官遘  
疾卒於長安第春秋若干王祥未施於邦正陳寔近  
終於邑長位不克德其如命何神龍初中宗克復丕  
業格于文祖迺輓從臣緬懷先正以公二子在章綬  
之列追贈公使持節太州諸軍事太州刺史非夫立  
言不朽陰德陽報安有藐諸孤而隆旣沒世而榮號



哉夫人天水趙氏殿中監武強公某之女也受訓公  
宮作合君子言容貴於國史德行循於法度六姻之  
內宗焉始有輔佐之力卒延門戶之寄初公之捐館  
也九子呱呱哀哀喪位賴夫人是顧是復日就月將  
徙宅依仁闔門成訓三十年內八子登朝廷交虎綬  
之華門接魚軒之軫某年月日封梁國太夫人景龍  
二年五月七日終於長安之延壽里間遂遭家遷播  
几筵靡託而今蒙國昭洗情禮獲申以先天元年十  
月二十五日合塋於少陵原禮也第二第三子夫人  
在堂而沒長子第八子在殯而亡今並列於塋坵用

嘉魂魄長子故兵部郎中徵中子前武衛將軍泚永  
懷徽烈思勒銘頌郎中昔嘗緒言意感延州之許將  
軍今復哀託情深舊館之悲高跡難名短詞莫逮採  
諸故老恭存梗槩其詞曰

昂昂楊君

秉心泉懿

大河靈岳

含光毓粹

學妙妍精

文道逸思

行為時軌

言為故事

存蘊令德

沒楊虛位

善慶克家

哀榮乃備

嗣姑稱姒

敬妻曰冀

復有母儀

千載一致

貞墳土壟

同此地芳

烈攸封哉

金生碑字

贈廣州大都督馮府君神道碑

夫積德垂裕之謂仁追遠揚名之謂孝仁則慶鍾厥  
後孝則榮及其親嘗三復於斯言今於馮君而見之  
矣府君諱君衝其先長樂人也釋趙歸秦本家上黨  
分燕徙越又據高良自遠祖宗懷化侯業業以至于  
大父贈荊州都督益先考高州使君智幾咸以勲績  
建旟本郡甲兵雄於一方政化沓於千里君蘊含弘  
光太之德守冲默安貞之志秉難進易退之操誦希  
聲若訥之道為而不有故物譽難得而稱靜以居常  
故世榮無由而及以聖曆之歲終于本城子幼家艱  
喪禮蓋闕夫人麥氏備母師之六行履先姑之四德

處順思柔以成婦道及衛亡共伯而魯重敬姜誓以  
汎舟之詩遵其闔門之禮季子今冠軍大將軍右監  
門衛大將軍上柱國渤海郡開國公力士始自齧齒  
來儀上京既違徙宅之歡爰從倍年之訓感三州之  
深義易百代之因生捨馮亭之本枝從高僕之令族  
千秋仕漢遂去田宗隋會在秦別為劉氏遇風雲之  
感會承日月之光輝茅土吞其勲庸貂璫寵其慈母  
欣綵衣之貴精誠所感振古難傳噫歟資孝為忠隱  
心後動引桑霍之深誠慕金張之周密敬以衛王愛  
以安親而善不彰官不遂者未之有也由斯言之則

哀樂存乎心不以至音改禍福惟所召不以偏覆及  
詩云魯侯燕喜令妻壽母明神勞善人而壽其母也  
夫人以開元十七年享年八十有七五月十二日壽  
終于京兆之來庭里舍天子悼先賢之晦德嘉侍臣  
之克孝思賙祿之未崇創電窆之將及於是詔贈先  
府君潘州刺史備禮飾終招魂合塋是歲也大亨宗  
廟偏謁園陵錫類之恩施于卿士重贈府君使持節  
都督廣韶循康等一十六州諸軍事廣州大都督夫  
人受邑舊邦啓號南海從夫加贈改封越國夫人哀  
榮備于始終寵光洽于中外為子之道何以加焉於

是與兄左衛中候元璉左領軍衛郎將元珪等惟舊  
業之難名感新恩之存及思建碑表以永芬芳夫毓  
至德以庇後嗣仁之厚者也楊令名以崇祖考孝之  
大者也仁為五常之先孝實百行之首貫經教而莫  
比標人倫而獨出宜其鏤美金石式旌墳隧無忘清  
徽昭示來葉何必會稽江上獨有紀孝之碑安陵廟  
前空傳尚德之頌其詞曰

明珠紫貝產於南國代所珍兮允矣君子不耀其德  
克全真芳慶流我後高驥迫翥中貴臣兮朱轡象服  
寵及泉路榮其親兮孝道不墮勒銘表墓留芳塵兮

張說之文集卷第六

開化圖書館  
kaohua library

開化圖書館

kaikwa library



張說之文集卷第十七

碑

都督郭君碑

王氏神道碑

潞川郡王碑

唐故高內侍碑

大周揚君碑

左果毅葛公碑

贈涼州都督上柱國太原郡開國公郭君碑

奉勅撰

四時平分清秋之氣勁五方異俗崆峒之人武故隴

上多豪山川出將其有雲龍感召星象特生金鼓登

壇隱如敵國麾幢指塞自比長城得之於太原公矣

諱知運字逢時其先太原著姓今則晉昌人也本乎  
文王之弟是為號叔號或云郭因而氏焉自燕昭尊  
隗以築宮漢祖封亭以列國其侯于陽曲宅彼太原  
舊矣亭之玄孫友從太原徙隴西昭帝分隴西置西  
平郭氏又為郡之右族友之昆孫武威太守憲憲之  
猶子散騎常侍芝俱有名跡見於魏晉則晉昌諸宗  
散騎之後也爾乃一門連譽時人號曰三儒四海齊  
名天下謂之八碩光祿派分於馮翊廷尉世茂於潁  
川孝則天錫金忠則帝章冕服仁則獸猛不害信  
則童兒不欺豈直介休見有道之碑洛陽聞立德之

傳而已曾祖欽瓜州大黃府統軍上柱國祖才朝議  
郎瓜州當樂縣令上柱國父師朝散大夫上柱國贈  
伊州刺史磧鹵之地戎馬生交業戰鬪而弘勲仕州  
縣而為達塔莫京之繇福不在於其身積無聲之善  
慶必流於後嗣公太白之精雷泉之靈膺家之禎為  
國而生身長七尺力能扛鼎猿臂虎口虬鬚鷄麟射  
穿七扎劍敵萬人子卿路逢逢識將軍之相唐舉一  
見足辨封侯之骨解褐以善戰授昭武校尉秦州三  
度府左果毅以敗敵北庭加游擊將軍沙州龍勒府  
折衝兼右金吾郎將兼海軍副使以軍界破虜即授

其州刺史進當軍經略使朝廷以未愜前除且有後  
命遷本衝中郎將仍舊為州軍使默啜之寇北庭也  
公奔命解圍軍聲大震加雲麾將右武衛將軍封介  
休縣開國公食邑二千戶開元二年吐蕃入隴右掠  
坳牧公兵以奇勝寇不復蹤積甲山齊而有餘收馬  
谷量而未盡歸功廟筭朝議多之拜右羽林將軍持  
節隴右諸州節度大使兼鄯州都督河源軍使鎮西  
陁信國之藩屏坐北落亦王之瓜牙故入奉期門而  
出分閫寄於是料敵無備聞其師老潛軍一舉大俘  
九曲鎧甲文劍燹馬犖牛既獻戎捷遂頒朝陽乃兼

馮曠卿攝御史中丞封太原郡開國公加前食邑三千戶執憲揔軍典屬乘障增爵益邑遇厚恩深俄而六州群胡相率大叛命公統隴右之騎濟河曲之師鋒鏑爭先玉石俱碎拜左武衛大將軍授一子官金銀器百事雜綵千段班師臨洮道茲雲疾嗟乎匈奴未滅宿志不申生也有涯死而猶視開元九年十月二十二日薨於軍舍春秋五十有五蕃夷邊鎮血面推心悲慘風雲號慟山谷豈非良將視人如子人亦視猶父乎皇帝聞焉詔贈涼州都督米粟五百石錦帛五百段命都水使者張景佚備物護塋遵朝典也

惟公氣猛而性和量寬而精銳沉謀可以掩著具蔡椎  
斷可以奪鬼神故常糟粕翰鈐芻狗風角然其樹恩  
結信立威用武烜赫如風濤震盪如雷雨戰必克攻  
必取每有奏謁特稱歎孝文之得魏尚虜不足憂  
太祖之見郭嘉知成吾事前後錫錦衣寶帶文馬素  
女爛其盈門長鳴在厩感知已之主陳必死之力皇  
情西顧則九羗豐鼓詔書北伐則六狄焚旗上成聖  
君之玄鑒下効武臣之素節其竟也如此夫為人子  
立廟致敬祖考來格不亦孝乎為人臣恢疆禦侮以  
勞定國不亦忠乎若然者歸義方於先人揚令名於

後代可也嗣子英傑起復定遠將軍左領軍衛翊府  
中郎將假紫服金章河西節度副大使英奇朝散大  
夫前尚輦奉御英協游擊將軍前京兆府勵行府右  
果毅都尉英彥朝議郎前左衛胄曹參軍等咸善居  
喪而過哀或從王事而奪禮則知辛賢父子繼位將  
軍祭彤兄弟並參師律去本不戀達也而新是謀權  
也嘉此武功創其宅兆以十年七月葬我太原夫人  
燉煌索氏祔焉禮也皇上念功以惜逝厚終以遇存  
有詔詞人為其碑志介士送葬即封征虜之墳單于  
入朝當祭度遼之墓銘曰

觥觥將軍 雄略冠群 平西征北 震戎疊種

亭障卧鼓 屯田饋軍 仗此白刃 致彼青雲

郭侯宴喜 既多受祉 玄牡獻皮 清廟蠲祀

鼎食金奏 炮鼈膾鯉 既來不庭 有嚴天子

流沙博望 羽林飛騎 河曲回兵 臨洮舊防

手握金節 寬沉玉帳 千里送喪 三軍悽愴

詔葬禮崇 恩碑義豐 生為神將 死為鬼雄

身世一滅 榮華萬空 祁連之墓 長旌武功

右羽林大將軍王氏神道碑奉 勅撰

維大唐開元十五年閏九月二十三日庚申判涼州



都督上柱國晉昌伯薨于鞏筆亭故也夫事君効命  
之謂忠殺敵榮親之謂勇干星襲月之謂氣逐日拔  
山之謂力有一於此名猶蓋世矧兼其四何人問焉  
是晉昌所以錯落將星崢嶸山家者也公諱奘字威  
明瓜州常樂人也父壽因公建績致位九卿臨難守  
死褒贈特進審塞翁之倚伏達矇眊之浮休老而益  
壯沒而立名者矣公威聲發於雷泉武毅標於峒嶺  
小頭銳上猿臂虬鬚龍劍淮百勝之鋒虵牙得萬人  
之敵技自行陣果有呂蒙之才拜於壇塲不無韓信  
之用始仕鎮戍歷班外府及即將中郎至軍副率雖

驟移官守而恒在壇場郭知運推轂河源握符隴右  
公未登一命事主將之旌麾不出十年代摠戎之節  
鉞慷慨之生以為美談於是自驍衛將軍遷羽林大  
將軍既督右兼統河曲綰塞垣之十軍佩節制之兩  
印大田多稼屯廩百億蒐乘籍馬而鐵騎數萬迺蹈  
赤山焚薊幕獵清海駟犂牛喑鳴則七戎僻易烜赫  
則千里震動亭候恃其長城廟堂賴其神將月獻戎  
捷歲行軍賞王侯無種屠狗起於將軍戰伐有功爛  
羊超於都尉前後翻飛幕下奮躍行間跨軍典郡腰  
金冠王者數十百人矣每至入朝奏謁并殿論邊山

川險易立成於聚米攻守方略一決於前籌遙詔置  
兵先合漢光之旨新書從事暗同魏武之心故得延  
譽上騰風雲鬱其氣色恩榮下杏日月供其輝光當  
斯時也疇踖攘袂三垂可以氣壓百蠻可以力制即  
叙者老生之常談和親者堅儒之怯計安足為神武  
非常之主道哉誓請先拔大戎次繫種鬻盡區域於  
西海關郡縣於北荒輝皇靈於天外圖壯節於雲閣  
其事如果曠古未傳惟君知臣保斯言之可復何神  
與善負厥志而無成是秋八月吐蕃犯邊瓜州失守  
盜憎吾將執致其親公以為背父立威非孝也頓兵

從敵非忠也大義逼而忘家方寸亂而供國其定計也成列而出討賊盡狄而退殺身忠在孝先將之道也公馳駟要謀而迴紇內叛以八九之從人當數百之強虜然猶虓噉擊射殺傷略半亭孤兵盡流矢橫及所謂仆而餘威折而不撓矣嗟乎嘗膽之憤空結噉肝之怨莫讐天子聞之黯然興歎人言以命許國夫豈志其言哉苟枚必死之忠烏問不虞之過至夫蓋聖主推仁恕於天下懸大信於後人愛欲其生懲晉侯再克之喜惡傷其沒抱秦伯猶用之誠婉獨見之端豈常情所逮謀臣飲恩於望表猛將感德於事

外然後任人之國衆可知也乃下詔追贈荊州大都督禮命窀穸加常二等死事之經也公之伉儷曰武威郡夫人夏氏韓母築城之智孟光舉曰之村拔棘解圍三軍攝其健婦崩城慟哭四海傷其孝妻此又間代之一竒一家之兩絕者也嗣子尚衣奉御承榮天獎賜蘭星祥名寶禮義形於橋梓哀戚過於縗麻稟訓惟堂克持門戶特奉恩旨收其二蔭飾樞玉關既薨上國以十六年十月詔塋於萬年縣見子之原鹵簿齊列方相雙引京尹護喪史官頌石千乘送塋觀驃騎之威儀十里開塋識龍驤之丘墓銘曰

合衆在仁 正兵維義 將為天目 國命所寄

曲乃老師 輕實兒戲 安我封畧 才難不易

赳赳將軍 貍貅絕群 起騰白地 騫翥青雲

朝盛勇爵 家榮戰勳 衆聲飛譽 帝曰予聞

甲兵繕肅 屯積萬庾 馬量百谷 甘心犬戎

拍掌獲鬻 大畢當趾 單于可掬 壯計先達

王師未張 城隍孤塞 冠及高堂 忠先孝後

取敵而亡 外仇易復 內變難防 克日將戰

呼天不假 岑彭詐客 張飛帳下 流錡何人

交錢去馬 蒼黃反覆 哀哉命也 羨殮姑臧

寵 芒陽 東都門外 南登路傍 高墳累累

列樹 行 父子同地 何殊故鄉 詔刻金石

儀形意氣 隱善必書 殤魂不諱 事弃忠在

生輕節貴 嗟爾明靈 銜恩求慰

撥川郡王碑 奉 勅撰

珠王無遠而馳輦乘輅之飾寶也松栝無幽而入殿

登堂之構才也物貴其用人亦如之撥川王論弓仁

者源出於足未城吐蕃贊普之王族也曾祖贊祖尊

父陵代相蕃國號為東贊戎言謂宰曰論因而氏焉

公有由余之深識日碑之先見陋偏荒之常毳幕上

國之衣冠聖曆二年以所統吐渾七千帳歸于我是  
歲吐蕃大下公勒兵境上縱謀招之其吐渾以論家  
世恩又曰仁人東矣從之者七千朝嘉大勲授左玉  
鈐衛將軍封酒泉郡開國公食邑二千戶周語曰犬  
戎樹郭守終純固今其俗擴而輕死其法折而不撓  
故前代無降人中土無僮僕自公拔身向化守夔華  
風澤潞之間始見戎州矣若夫河南胡苑坳牧所利  
每歲冰合虜騎是虞中軍必謀於元老亞特固選於  
時傑神龍二年以為朔方軍前鋒遊奕使景龍二年  
授左驍騎將軍開元五年兼歸德州都督使皆如故



八年本衛大將軍改朔方節度副大使公之理兵也  
堅三革利五刃偶拳勇齊力信罰分甘苦六轡如手  
賞千夫一心接獯獫猶蚊蚋卧沙塞如衽席荐居露  
食垂二十年雨畢而成師冰泮而休卒寒氣入於肌  
骨夜霜出於鬢鬚人不堪其勤公不改其節韓公之  
建三城也公洗兵諾真之水刷馬草心之山以為外  
斥而版徒安堵鄭卿之和默啜也公授館李陵之臺  
致饗光祿之塞以為內候而賓至如歸九姓之亂也  
公四月度磧過白堊林放火拔部帳納多真種落彌  
川蒲野懷惠志亡漢南諸軍隨其計也降戶之叛河

曲也公千騎奮擊萬虜奔走戡翦略定師旅方旋而  
延陀跌復相嘯聚上軍敗於青剛嶺元師沒於赤柳  
澗公越自新堡奔命寇場羸糧之徒不滿五百兇醜  
四合衆寡萬倍公殺牛為壘噉寇為餉決命再宿衝  
潰重圍連兵躡踵千里轉戰合薛訥於河外及知蓮  
於殺手朔方諸軍壯其戰矣斫摩之奔也邀於黑山  
口覆其精銳市惠之背也追至紅桃帳掩其輜重乳  
泊之會荆蘭池之狂胡禾盤之役縲方渠之逋寇凡  
前後大戰數十小戰數百筭無遺策兵有全勝是以  
六狄逃遁三垂又寧聲暴露於天下業光華於代載

信皇威之所加亦武臣之力也故錦衣寶玉允答戎  
功申第良田丕承錫命語其智効未甚優寵黃頭黑  
齒比價齊名積戰多瘡累勞生疹恩命尚藥馳往診  
之晉豎已深秦醫無及十一年四月五日薨於位享  
年六十制贈為撥川王稱故國志其本也太常議謚  
曰忠由舊典昭其行也長子盧襲官封繼事業次子  
舊久特拜即掙十二年四月詔葬於京城之南懷遠  
人也大路鼓吹介士龍旆虎帳貂裘封犛狗馬吉凶  
之儀舉夷夏之物備長安令摠徒以護事鴻臚卿序  
賓以觀禮哀榮之道極矣君臣之義厚矣有命國史

立碑表墓吾嘗同僚敢昧遺烈銘曰

黃河接天 清海殊壤 舉世安俗 拔俗誰放

倬哉論侯 利有攸往 奮飛橫絕 搏空直上

以衆疑塞 因敵立勳 吐蕃萬戶 今嘯成群

精感天地 氣合風雲 旣封酒泉 乃位將軍

朔方陰塞 直彼獯虜 帝命先鋒 闕如虓虎

山北加電 漢南擊鼓 十數年間 擢國威武

我有師旅 將軍掬之 我有邊氓 將軍育之

柳澗亡師 一劍復之 蘭池叛胡 三戰覆之

武節方壯 朝露不待 王爵送終 宿恩未改

時來世去 人物如在 銘勲謚忠 以告四海

唐故高內侍碑

孝足動天義堪變地河中見三州之姓炳彼精誠南  
亭聞再逢之母彰茲竒事不有陰德曠代誰隣內侍  
高延福者將軍力士之慈父也粵自西雲干呂東明  
銜璧以亡王之族處巷伯之官而將軍本擊馮亭代  
家南越知父母來奉宮闈老而無子曰悲幼而失親  
曰善調之悲者笙磬異器而同音貌之苦者秦胡別  
杖而共色從此斷金合要投漆相受承順無違日嚴  
生乎本性仁慈匪飾天屬由乎自我父子之名既定

姓氏之目因移大將軍之家去鄭而取衛平原侯之  
室變郭而從甄亦猶是也既而內侍以鴻漸登朝蒞  
蒞朱紱將軍以龍樓得主豔耀金章其訓子也温室  
之樹無言車中之馬數對其事親也三牲有養志之  
樂百行無匪疾之憂至矣哉高氏之子也以思親之  
願而展親以欲報之誠而報德神明翕而哀懇荒藁  
竦而慕義乃有傍求聖善提挈炎洲二紀積離萬里  
遙至音容莫識涕對茫然驗七星於子心認雙鬟於  
母臂而後深傷損感若墜谷而登天蘊怨都除類愈  
矇而覩日於是盡歡二媪兼敬三人均養之恩咸不

寐於十起反哺之志齊色難於一堂群公賀虞潭之  
親天子歎馮勤之母此復然矣內侍事主四朝歷官  
七政專良恭肅著美綸言冲謙儉讓得名朝列年六  
十有四開元十二年終於來庭里明年某月塋於長  
樂原繼子力士喪孺慕而加等塋塋誠而備物義方  
之經鬱為稱首孝德之傳今見其人永維先恩追緜  
餘烈若夫慈羈旅之稚童仁也約詩禮之尊教義也  
貴不居而要避權禮也生推心而死有託信也仁為  
德本義為行先禮為身宅信為意田故仁之報也壽  
義之報也樂禮之報也安信之報也順履順居安乘

樂享壽此四者生人之偉事目牛之深致者矣於戲  
頤賜冠馳寵勢偃蹇俗上煨燻君傍者豈不思景行  
高山慎視前轍如或少選亡禮顛沛違仁瞻言四報  
咫尺千里揚芳樹淑其務乎子固春秋之徒也不懲  
不濫而勸不僭義重天綱孝崇人紀樂諄諄之成訓  
善哀哀之克子不著倚相之書將受丘明之耻九原  
上千月深覽碑版傷知音有以見古史之心也銘曰  
高堂樂未散 重壤哀已擗 寶帳吹靈衣  
金罇照塵席 苦長夜之易泯 怨寸景之難惜  
刻義聲與孝心 萬古千齡傳此石



大周故宣威將軍楊君碑并序

公諱令一字令一太州仙掌人也隋司徒觀五之玄  
孫周孝明高后之歸孫  
衛卿之元子維有隋接  
三統建萬國我高祖以同姓為王維皇周敦九族叙  
百官我諸楊以外戚而貴公體玄黃之純粹承河山  
之不緒孝乎內炳忠焉外均性與天和道合仁愛收  
恤孤左分產踈屬恭於周施約於妻子加以樂善而  
好學降尊而容衆能辨樂和思柔酒德容止碩士與  
之遊焉而曰君子若夫漢魏舅族有恩澤之封公鄉  
門子有良家之侍公浮雲世祿匪石襦風究乎王道

之紀綱明乎人事之終始年十九舉進士高第授潞  
州叅軍轉千牛胃曹遷洛陽尉從班次也居無何拜  
朝散大夫行通事舍人俄而加太中大夫檢校天官  
員外郎夫行人之在周禮方國是接公修其政令帝  
曰余嘉卽官之著漢儀列星是應公司其典故特稱  
邦則國家左賢右戚一武一文以公地望羽儀寄深  
虎旅除宣威將軍行右衛翊府卽將僂從事非其  
好也初公時為卽也遼戎悖虐作患幽冀皇上懊休  
下人故我有神兵之役選達權靡鹽之吏佐猛毅維  
城之師乃下制以公為兵曹馬有密贊車政獨飛長

策豈云卒乘輯睦戎機式序若比而旣哉俾雷霆颯  
動剽慝斃邦威玄兔懷黃龍馬未汗而狄盡人未疲  
而兵戢者公與有力已及班師振旅冊勲踰時常用  
咨有司之遠古念有功之未祿將迓德命需多勤有  
日矣方當翼大化增三光之明熙天秩垂九德之聲  
昊天不惠厲氣流行如何斯人胡不眉壽年四十一  
聖曆元年夏六月辛丑遘疾而卒嗚呼哀哉梁木未  
施予道不究呱呱稚嗣仰號蒼穹哀哀嚴親惴臨淵  
谷遐邇察舊暨乎欽風未識之徒罔不盡明悲而輦  
歎矣夫子憫焉弔之以玉冊賙之以錦衾群公傷焉

誅德於素旆圖休於青史粵乙卯假葬於合宮縣平  
 樂鄉之北阜郭門十里却山西岡巒萬古之阡都邑  
 九原之地隧寄新隴魂懷故域藐視諸孤未遑歸葬  
 平生志事孰已焉哉厥第五人比才連譽曰踐一獻  
 一循一惟一尚一等因心則友世稱萬石之閨門死  
 喪之戚吾見伯淮之兄弟僉曰我圖後事冒除乎哉  
 乃布哀友生記詞懷舊跡德表墓祖之來昆其銘曰

洪河南注

少華西峙

氤氳靈會

生此君子

生此君子

維國之紀

宣慈惠和

禮樂文史

敦錫宗類

汲揚微否

勤然濟物

若不由已

克明從訓 誕敷厥美 修詞北闕 潤色東里  
揮翰文昌 列星頓晷 交戟禁衛 為王瓜士  
允武允文 翁歸是比 疇曰禦冠 諗軍北鄙  
攘狄黃龍 濟師蒼兕 將王玄默 繫公是恃  
帝懿乃勲 將圖膺仕 仇仇執憲 不我力以  
役役大勞 未受多祉 有命無祿 洪基中圯  
父兮葆鬢 孤兮稚齒 孔懷靡及 凡伯萃止  
陟彼却山 丘墟歲磔 荒草無際 群哀所起  
于嗟楊侯 託居此矣 沕滴綿曼 德音之已  
久客思鄉 永懷桑梓

元城府左果毅贈即將葛公碑

公諱威德字某曰葛氏京兆涇陽人也其元龜姓咎  
繇之後夏有葛伯氏族興焉寧陵之傍尚傳侯國綏  
山之下獨有仙祠嬰則威服五城襲則績稱二縣鴻  
臚秀於吳會散騎崇於晉景在其子孫是宜繁羨公  
生而開朗長而英拔非因馬鄭之學動合禮經不待  
孫吳之書睹同兵法有拳勇尚氣槩顧眄稜華風神  
都爽五馭善於東野六射勁於西霜少以燁姚之才  
入光供奉之選御橋駝駕犯清蹕而不驚輦道啼鳥  
應鴻弓而自落便蕃左右星歲重深賜上柱國拜元

城府左果毅天下大定李廣之用無施雲中薦賢馮  
唐之言已老春秋六十五神功二年某月終於洛師  
蒿殯卽阜夫人太原郡王氏夫人郭氏實生大將軍  
福順一見聖主再紉乾綱重位冠乎北軍茂功截乎  
南史故象服臨祭魚軒以朝天子深嘉歎馮勒之母  
群公列拜賀虞潭之親享年七十五薨於京兆之三  
真里公愛敬奉親軌則移於後伐義方訓子福及來  
於先人墓有日矣乃下制曰禮著飾終情惟悼徃詢  
諸前列抑有舊章前左羽林軍大將軍葛福順父某  
守其謙素弘此藝能未展才術奄從凋殞而嗣子克

家式昭勲業既念功以追遠亦自葉而流根宜申獎  
 贈俾慰泉壤可贈游擊將軍守右驍衛翊府即將開  
 元九年二月九日葬我即將君前夫人王氏後夫人  
 郭氏柩為禮也章弟以槎輅旗在列廟食備其牲牢  
 法塋陳其簫鼓孝慈之道著矣哀榮之禮畢矣尋彼  
 平生之事忽如絕光擊乎碑版之文永存遺烈銘曰

硜硜都尉 角立傑豎 神銳玉劍 氣雄金鼓

六藝爰設 射馭為武 百行雖名 忠信為主

時不兼命 位不克才 善流慶答 身謝榮來

太原棣棣 寔惟嘉偶 羽林桓桓 克大其後



張說之文集卷第十七

燕化圖書  
Kanhua library

卷十七

七

太原府

定州嘉興

羽林

克大

開化圖書館

Kaichua Library

開化圖書館

開化圖書館

張說之文集卷第十八

碑

廣州甄公碑

豫州魏君碑

刺史徐府君碑

鄭府君神道碑

陸公神道碑

唐故廣州都督甄公碑

君諱亶字道一中山無極人昔胡公紹舜奄有大邦  
楚子縣陳逃威樂土當烈王之王也有陳通奔周王  
以為中將美其族言舜居陶甄之職命為甄氏錫姓  
因生如堅之讀形聲轉注以真為音處則稱劉明歸

晉者以異變而為郭蓋承號者有馮通之禱邨仕漢  
為太保大司馬承陽侯邨十六代而生鸞任齊太山  
太守司隸校尉無極縣伯撰笑道論行於代鸞生隋  
汾州刺史族族生隋沁州刺史紹紹生隋市令協協  
生單于大都護府錄事參軍贈宋州刺史封惟祖惟  
曾在商在夏世濟其美永觀厥成君即宋州府君之  
第四子也博綜經史脫畧流俗情之所遺對咫尺於  
千里氣之所重輕百金於一諾曰興曰比階應劉之  
闡與或草或真戲鍾張之筋骨譽滿鄉曲聲聞闕庭  
天后臨朝再加辟命皆辭以親老不赴逮疾革易簣

骨立廬墓復有制徵烏刺史獨孤莊率府僚敦喻起  
於墳左乃授左金吾中候生盡其養豈違親許人沒  
盡其哀方委身徇國或用或舍有以見大君之仁時  
止時行有以觀大孝之節君臣之際其遠矣哉尋除  
左千牛長史檢校武始軍長史攝右臺侍御史兼武  
道行軍長史攝右屯衛郎將副臨洮軍使轉右驍衛  
右郎將為臨洮大使拜蘭州刺史兼榆林臨洮等軍  
大使除夏州都督兼鹽州防禦使徵授幽州都督衣  
之以紫攝御史中丞為河北軍州節度大使君政成  
周月惠則在人患是綏風表以去職未幾復除夏州

都督屬山戎矯虔傲優王畧兵落天上思迴行以出  
竒虜墮計中守便宜而未進時以為逗遛貶撫州刺  
史朝廷明此舉也未到官遷廣州都督兼嶺南按察  
五府經畧討擊使春秋五十有七開元五年七月二  
十八日終於官舍以年月日歸葬於恒陽之王公山  
南原不忘本也君三承辟命再攝憲曹八典戎旅五  
司藩翰事之去就所歸必執報其中職之高卑為政  
各當其選觀夫果於事喻於義下學而上達強立而  
知類畏尅厥愛道無常師有商也之文有求也之藝  
習禮必本飾之以精華積行必崇茂之以枝葉以此

探賸則投刃皆虛矣以此効官則操刀必割矣是故  
群士之所執掌而君之所綽約常情之所戚戚而君  
之所蕩蕩由是言之搶榆之與海運鳴琴之與星入  
從可知也惜其志懷慷慨雅多大畧授桴作氣有七  
縱之能孤劍無前當萬人之敵竟不得橫絕漠騁雄  
筭刮狼望之視鏡乎太清卷瀚海之波靜而可掃駸  
駸之足受羈騏驥之途堂堂之貌不盡麒麟之閣彼  
哉有遺恨矣其孤某等望兮不至求兮不得永懷揚  
名庶慰罔極銘曰

有鯨在下

淘復河濱

元女作合

相攸于陳

楚為不道 祚以永淪 周寵忠節 氏以初因

丕惟承陽 致君論道 施及無極 遠家載考

彼汾彼沁 伊時之寶 宰考牧考 亦孔之好

積慶潛演 後人挺生 標格磊落 氣志清明

八司戎事 厥謀有成 五刺方伯 厥政有聲

山有杞梓 工思其度 國有孫吳 君思其畧

弃德珠浦 遺氛沙漠 惜哉不當 今也可作

恒岳臨北 溥施注東 仁不忘本 孝亦令終

壽堂盤薄 牧子克窮 勒美松隧 穆如清風

唐故豫州刺史魏君碑時為荊州長史作



公諱叔瑜字思瑾曰魏氏鉅鹿曲陽人也考太師鄭  
文貞公致君皇極配神清廟故祖德胄系叙於太宗  
之先碑矣公生育慶緒天然炳胎教之姿少長德門  
日用成躬率之化性盤於孝友習徂於禮樂俛仰中  
則從容蹈道加以專精好古旁通多藝聖人之所志  
聞一及三君子之所能舉十而九與同生璘琬知名  
當代始以門資補左千牛轉洛州司兵司議卽職方  
卽中太子洗馬出為懷州長史歷慶慈儀豫四州刺  
史春華譚於兩宮時兩零於四郡觀風之使所在聲  
聞變雅之老則今遺詠其年春秋五十有一終於豫

州墓于舊域夫人太原王氏祔焉禮也議者以公不  
避強禦有昭子之政事不為皎厲有康子之隱德虛  
已尚賢有文侯之樂善重諾分急有信陵之高義人  
鮮有一况兼四乎公賦入封君妹歸帝子車馬無戚  
里之盛衣服有儒者之節儉而得禮富而無驕此蓋  
奉先之素履也公善於草隸妙絕時人以筆意傳次  
子華及甥河東薛稷世稱前有虞褚後有薛魏此人  
胎訓之餘美也嗟夫嗟夫公學埒向韶操齊固熒若  
天假三壽朝登六事則鄭之桓武可尋漢之常平一  
揆而年近知命位止方州落鵬翼於半霄負天之力

揚子年近知命位止方州落鵬翼於半霄負天之九

莫展頓龍媒於局路追風之勢斯畢九原不作誰將  
與歸二子獻華追存先德禪子作頌以慰罔極銘曰

昂昂豫州

毓粹含道

銘若古訓

思文烈考

於穆烈考

維國之師

公承丕構

思皇續之

發軔臺閣

風流榮問

建麾千里

擇露四郡

位未克德

命不遂才

彼蒼孤善

謂之何哉

子孫必復

丘封永久

穆如清風

振芳厥後

唐西臺舍人贈泗洲刺史徐府君碑

叙曰經天地揭日月文之義也掌邦籍出王命位之  
崇也本乎言行君子之樞機成乎易簡賢人之德業

則徐公其人也昔公奮明哲之姿當高宗之盛天保  
大定俊乂用彰而光耀天臺雲飛綸閣文敏以暢機  
務稽古以析嫌疑禮樂政刑擇三代之令典典謨訓  
誥有唐虞之遺風較然於庶績者可得而聞也其嘉  
猷讜言沃心造膝滋液內潤精微外密混成於元象  
者不可得而聞也公諱聃字將道姓徐氏東海郟人  
也遠祖偃王基仁義於上代嚴考孝德濟弘美於近  
世公始以弘文生通五經大義發跡曹王府參軍以  
千牛曹潞王府文學崇文館學士兼侍皇太子講又  
芳林門修書于時中朝碩老下國英雋皆忘年請交

不遠來謁望其路者若晨風之赴比林得其門者如  
衆山之仰東岱公不樂趨競雅尚退謚深以椒房之  
家聲名太甚求為外職出宰桃林未下車勅改沛王  
祿終歲選擬司績員外司議即並不就乞補雲陽令  
到官累日詔除司城員外郎乃選西臺舍人其為政  
也如台示爾初公幼而殊異八歲工文太宗聞之聰  
明召試詞賦錫以佩以金鞞稱曰神童及中年高宗  
乃道憂悉命皇子受業訐謨帝來許以國釣故公備  
更潞沛豫諸王侍讀上之在周邠也公嘗未誨詩焉  
夫然集虎觀之書承龍樓之問二宗之代矯首辭林

四王之門從容經席非有海山之藝溫良之德儀形以乎柔嘉維則其孰能發揮聖智啓迪天人者乎咸享元年出為蘄州司馬二年坐事徙於欽州君子大守道而小守位污隆隨時屈伸以義亡令尹而不愠失司寇而遂行蕙蘭敗不為不芳日月蝕不為不明古務忠信何陋蠻越優游欽江歲餘而沒春秋四十有三惜乎不登宰衡以平天下天天是瘖命也歟既而慶隆嗣子返公孫之樞德施後王拜先師之爵上元三年某月歸葬於少陵原中興神龍元年贈泗洲刺史褒賢追遠念道尊師聖人之禮也議者以公考

果州府君高學才華香名省闈武帝賢妃姊也太帝  
婕妤妹也公既高步掖垣子又踐脩舊職同生標藻  
於鸞殿重世含章於鳳池自班姬父兄文雉漢室左  
思女弟詞蔚晉宮悠哉二族徐氏三矣才難不其然  
乎凡是好文之君賞音之士公之逝也豈不慨然閱  
青簡而在凌雲之氣操朱絃而想流水之屬哉厥子  
曰堅景龍中加金章紫綬行禮部侍郎得以命卿之  
祿奉蠲潔之祀無念烈考樹之家風迺刊石立頌將  
以識徃行據無窮使本枝百代不忘先人之殞其名  
也其詞曰

王言惟令 中禁是司 帝嘉文父 曰汝宜之

終温且惠 習禮明詩 長裾傳道 大筆修辭

鳴業潤色 玄黻緝熙 昊天大戾 君子明夷

蒼梧啓手 涅而不淄 中興受命 逝者無追

靈符泗水 崇贈先師 髮像精鬼 丕承聖期

教近子貴 榮躋父慈 學嗣三業 才俱一時

春秋孝享 霜露深思 後之視昔 斯文在茲

大唐中散大夫行淄州司馬鄭府君神道碑

五山可陟惟德也為之崇高萬物皆化惟名也謂之

不朽若夫行欲蓋而德彰道無求而名立常聞其語



今見其人公諱其榮陽人也華州刺史襄城公偉之  
曾孫蒲陽太守大濟之孫荊州刺史乾獎之子在昔  
周王敦序九族邦懿親於鄭維時鄭伯敬敷五教賦  
善職於周其後蕃衍儒門光華士族威行西域名震  
京師入則天子授經出則單于抗禮公揭日月表山  
川體二氣之清淳納百代之層慶越在岐嶷異於常  
童以旣冠帶遊皆長者初以門子宿衛解褐涼州參  
軍轉嘉州司士又宰鍾離當陽二縣皆秩滿兼攝江  
陵其月政不改俗官不易方群盜出奔遠人來附其  
所處也入境聞愷悌之聲其所去也扶路有鬱陶之

思非夫忠信以結之法令以齊之易簡以業之仁義  
以肥之孰能順人如此其理者乎神皇玉冊受天金  
壇拜洛頓綱而鶴書下關門而群龍至公侍御公車  
召議宣室自以竒士承一顧之恩許其正人參四率  
之屬乃墨制除太子右清道長史尋加中散大夫行  
淄州司馬負士元之才於是拜職過丘明之疾從茲  
挂冠洛汭閑居漳濱沉痾優游卒歲福應愆期豈唯  
朋友之哭將見神仙之予享年七十有九神龍二年  
夏六月十五日終於洛陽之私第冬十月一日葬於  
滎陽之原成先志也公執親之喪三年泣血以聞州

里不亦孝乎先人餘業一物不有以讓兄弟不亦悌乎加以賑窮紓急隱德陰施惠人由已反身待物是用氣類益親聲談載路善擊劍好投壺盡五射之妙巧究六書之體勢此蓋行有餘力則以多能位不充量天之命也有子曰博雅曰嘉徵曰嘉慶曰重生極其養沒過乎戚恭惟皇考安宅靈丘盛德備于卑位家風缺乎國史伐石他山寄哀嗣客子產遺愛得無叔譽之言公業不忘實有荀攸之歎式撰鴻烈垂之後昆銘曰

大君有命 桓公封鄭 世執王政 其後不競

為韓所并 以國成姓 沉水截河 溢為榮波

荆山之阿 勝氣實多 高門峩峩 衮服委佗

猗嗟君子 世濟其美 動如義市 居成仁里

鳳集文史 猿啼孤矢 義政當官 惟人所安

救危極越 勞而不伐 大運奄忽 芳留形沒

高隴既封 深泉文重 徑無人蹤 蒼苔歲濃

哀哀丘壠 墮淚青松

唐故贈齊州司馬陸公神道碑

公諱孝斌字順姓陸河南洛陽人也某先帝媯啓姓

陳胡立族敬仲之孫有齊國宣王之弟封陸卿蓋命

氏之所由興也秦并諸國陸氏分適燕魏文成帝時  
東平成王侯生平原簡王麗重世游美為國之華公  
即簡王七世孫也會祖彥昇北齊以文藝高選任祕  
書郎以至德表居號終孝里祖玄亮隋膺揚郎將父  
淳感盤桓利貞弓招莫進同誌誅行謚為惠康孝悌  
仁義世不殞矣公誕靈冲和稟識高朗簡而中禮易  
者而達節篤學勵行者實飛聲文史者宗其淵府德  
行者仰其墻仞舉國子明經選絳州叅軍始州司法  
其在官也示人親其親長其長不苛察而小無察不  
皎異而大有成知常曰明常愔如也喪親過哀因中

風廢卧疾累年不起楚即肇封大羅雲逸雖沉痾未  
弭而僉望先歸授楚王府兵曹參軍實有躬師賓之  
禮目擊儀形之訓府罷授趙州錄事參軍以病去職  
聖曆元年匈奴入趙公危邦不處盡室以行望河南  
而將濟至黎陽而疾甚年六十二月丁未終於姚  
村之逆旅歸殯於滏陽之郭北先天二年皇帝踐祚  
以故吏贈齊州司馬惜哉用公之道行公之志上可  
以序三光下可以平九土存則位不克其德沒則榮  
不逮其身命也夫夫人范陽大君盧氏故岐山丞元  
瑾之女恭儉之德備貞信之教興妻道母儀自家形

國享年七十有六開元六年十一月丁未終於洛陽  
之宣教里八年五月丙子合葬於漳北之神岡禮也  
初咸亨中王師征遼公叅是軍事友人太原王守義  
遇疫於海東路艱寇阻兵危勢急公獨顛沛致喪歸  
其井邑其在安州也朝廷以公精達法理乃命覆因  
劍南梁岐冤繫動盈千百冊筆所詳十全八九其捨  
生徇義返已施仁皆此類也禮莫重乎飾終於見其  
不朽矣善莫大乎餘慶於如其有後矣四子伯玉仲  
容叔獻季良泣血銜恤視天若墜俾予作頌式昭遺  
銘曰

曠哉陸公 觀奧臻妙 文雅外炳 清明內照

從政本仁 資忠移 不言而理 正身作教

才何富之 命何負之 垂彼雲翼 落此盛時

居喪柴毀 遭疾棲遲 德之休明 位匪為重

嗟嗟千載 賢士之隴

張說之文集卷第十八



張說之文集卷第十九

碑銘

崔君神道碑

馬府君碑

貞節君碣

元公碣碑

平偃師碑尾

龍興寺碑

大通禪師碑

玄識閣黎廬碑

唐故瀛州河間丞崔君神道碑

蛟龍蟠乎沼無雲雨而不翔君子志于道無運命而不彰然則變化者是神靈之末富貴者非德行之本守其真樂其分不其至矣世有人焉君諱漪字某博

陵安平人在唐為姜姓炎帝之孫也在周為崔氏齊  
侯之胤也遼源長發洪河之水接于天層盤烈秀太  
行之山拒于海東觀所以美其文宗北州所以貴其  
清族魏冀州刺史簡公諱纂君之高祖也齊散騎  
侍諱舛君之祖也隋大理少卿諱世立君之大父也  
故祁陽令諱抗君之皇考也承百代之隆慶摠五德  
之清淳孝友中肅宣慈恭儉好古博雅隣幾亞聖盈  
而若虛漢而無象非夫人入周公之廟升孔子之堂  
憲章禮樂鮮得其門而覩矣弱冠以門胄入國學舉  
進士母弟汲亦以明經何年擢第大理卿張公文瓘

人倫之表也。目君曰：昔兩劉並舉，以為騁二龍焉。今兩崔齊飛，可謂儀雙鳳矣。縉紳景慕，憧憧往來。徙宅就居，投刺成市。若衆流之赴壑也。及親而仕，盤桓利貞，解褐澤州晉城尉，降為光州安樂尉，授蘄州黃梅尉，轉河門丞。凡更三尉，佐四邑，體公綽之不欲勵，伯夷之高操，臨事御人以簡，以寬。雖為小政，必有可觀。故八使巡風，再薦清白。河上遺老，江濱舊吏，吟咏餘聲，祖述前事。人到于今，稱之若夫：碧樹煙藹於江潭，紅荷藻耀於澤畔。寶貝烟光於空浦，美玉明潤於斷岸。不為珍輿瑾輦之節，前殿後池之玩。誠自得焉。必

將有賞心之所歎也况乎殿邦光國之寶罇俎柱石  
之器道為帝王師言為天下利已而稅遠駕於窮轍  
頓高才於下位亦無憐焉固將有知音之所歎也垂  
拱元年奉使上都遘疾終於時邕里之旅館享年六  
十有二夫人河東裴氏湖州治中懷儉之孫滁州司  
馬昉之女也稟訓華室作合高門嗣徽先姑克和姊  
婦德容之盛圖傳罕有喪親過毀舜華朝落儀鳳中  
卒於鄭春秋二十有八長安三年春二月合葬於金  
谷鄉却山之陽禮也北據高岡連隴南面大道禁林  
上國遑洲川原指掌仙門宰樹碑闕相望玄靈喜之

是宅嗣子曰用景龍中爵安平縣子職兵部侍郎夙  
遭閔凶不承誨誘慎終追遠克家用譽蒙聖主拔竒  
賞異絕等超倫三顧赤墀之下一舉青雲之上祿廩  
所資吉蠲致羨實光人宥十世降祥之所及也永惟  
官不達者身不登乎明堂行不夸者名不書乎史冊  
則韜光隱德緒俾後代將何述焉夫銘景鍾稱茂伐  
彼大夫之事篆豐石楊令名此孝子之志辭曰

維嶽建國

厥生炎皇

維師尚父

諒彼武王

古人言曰

必齊之姜

齊之丁公

有崔者子

因邑命族

世濟其美

黃鵠倚歌

雕龍擅史

倬哉嗣武 含章挺生 以蒙養正 用晦而明

混之不濁 人莫能名 學以崇道 文以慰志

垂其雲翼 坦然卑位 祿逮吾親 榮非我仕

皇皇上帝 建官惟賢 有人在下 胡寧捨旃

孰云輔德 曾不永年 展矣邦媛 宜其家室

友如樂諧 皎如月出 重壤既兆 終天偕畢

比陵墳丘 松禩千秋 金碑石樓 祗令人愁

東都城郭 通澗鯉路 飛橋連閣 金管迭作

人世之轉然兮 山川之宛然兮 德音之緬然兮

故洛陽尉贈朝散大夫馬府君碑

君諱某字某扶風人也其先伯益贊禹中衍御殿在  
周曰羸在晉曰趙上卿以人歸政將軍以馬服為姓  
緝熙熙乎平通重合焜燿乎伏波中水我高祖汾州  
刺史諱歸歡我大父膺揚卽將諱士幹嚴考獲嘉令  
諱果濟美惟舊真德于君君幼而懷竒長有規操樂  
道稽古昇堂覩奧伯父匡武撫之曰亢宗保家吾有  
望爾悉以先人家謀圖傳付之入太學舉明經補巴  
西尉內憂去職君四歲而孤重集于蓼因心孺慕名  
教同傷歸次葭萌江溢毀道攀轎號慟濟為之却蜚  
人哀之葭棧而濟釋服調襄陽尉主進魚家絕魚食

州將曾王俾盤二百魚時其亡也遺之夫人以辭君  
還拜受使復王曰非唯是夫又亦賢婦吾嘗其一得  
其二馬長史孫悅是樊也舉君清幹有聞授  
清城尉未往且有後命為河西營田判官物土穡人  
藁穀洋羨皇揆其懋考績登焉程務擬之軍靈夏也  
咨君運籌乘遞入幕獲虜數百欲剝罄之君諫曰王  
者之師將德是以討叛惟武隽遠在寬博牛之畜不  
可破虱未擒伏念何逞曩囚乃止師歸策勲上柱國  
改溫縣尉冰淳阻飢廣提中外絕甘分少約已周人  
既喪好述室無嬖御夫人張氏詹事丞師寂之女也



敬事皇姑能佐君子娠有胎教宗如樂諧前誌之美  
多所闕載絳郡夫人王氏則天聖后姑之女子而夫  
人之母也嘗曰婦則女訓吾女有焉享年不永玄髮  
徂落時君之伯姊歸宗夫人推居解寢事之而躬處  
下室及亡設几筵於正寢惟明靈以女公之故憑巫  
通夢屢寢為辭舉家懇啓久而後定嘻生則盡禮死  
而知讓殆其神不昧溫秩滿轉洛陽尉當周之興也  
版都社澤郊廟粹紛嶽僕明堂京轂回回日不暇給  
又勅君專總徒匠凡三百有餘旬蘊勞成疾聃憂損  
壽永昌元年孟夏辛卯卒官春秋五十有七帝用悼

之贈朝散大夫旌淑紀庸禮焉龜玉在山泉為國寶  
以其靈與瑞君子居下位而上達以其名與義夫是  
之寵有由也哉葭萌之戚昭其孝也揚侯息浪異頻  
胥感襄陽之饋熾其潔也德形於家聲聞于外塞垣  
之謹植其仁也衆俘賴全將不為暴重屋之役底其  
勤也沒而益榮朝不棄力有一於此猶為令德况備  
舉乎豈其身將施其後厥子構據擇皆國之良也為  
有後之其在是乎徵構職太子僕景龍初宰長安永  
惟考襲朱芾已佩葱珩母氏早逝而榮不及讓乃賜  
階乞封先妣天子憐之制贈夫人清河縣太君人謂

長安能報恩矣詩云欲報之德昊天罔極報恩之謂也馬氏之墓世在扶風清河之喪也卜宅於洛陽却山麓後君捐館因窆其所夫人冗於兆之甲大夫窆於城之庚今龍集戊申將返墓故國君執友禮部侍郎嚴善思諗之曰夫子之逝一終八辰精氣其存親壤石矣吾嘗相二工從新其愈乎且不戀本達不合墓古神尚休無或變有夢先君者與其言叶於是祇率嘉話即安成規堙雙墳溝四壑傍建祠宇前勒豐碑茫茫天地永懷長畢誰居後之人匪唯是四時蒸薦之事所以觀百代祖宗之列其詞曰

昂昂大夫 有邈其致 洽聞膺敏 賙窮錫類

孝實迴川 清能改位 佐邑惟五 安人則四

多稼穰邊 昌言扈帥 比義后稷 勤官沒地

戲歆天朝 毳衣以遂 我有合德 追啓清河

宜家族揉 主祭神和 親戚光貴 劍蓋金歌

相從先後 樂此山河

貞節君碣

神功元年十月乙丑陽鴻卒於雩都縣友人沛國朱

敬則清河孟乾祚范陽盧禹等哀鴻抱德沒地繼體

未識考行定謚葬於舊域鴻字季翔平恩人也其先

著族右比平郡大父真陽宰適茲樂土爰定我居維  
桑與梓旣重世矣鴻個儻竒傑瓌瑋博達貫涉六籍  
百家之書其要在霸王大畧竒正大旨君親大義忠  
孝大節而已章句之徒不之視也嘗陋漢史地理志  
周禮職方志時異虛記心不厭焉乃攀恒岱浮洞庭  
窺河源踐岷衡稽四海之風俗筭九州之儉易與趙  
國貫高圖獻其議遇火焚盪天下壯其志而痛其事  
養徒問里不應賓辟儀鳳中河北大使薛公舉鴻行  
厲貪鄙天子嘉之用寘于吏乃尉汲曲阿主簿龍門  
雩都夫其屏居十年一方化德歷佐四邑諸侯觀政

惜乎有大才無貴仕命也初鴻遊太學有書生山東  
李思言物故南館鴻傷其終遠家屬有喪無主乃躬  
駕柩車送歸東土及在曲阿敬業作難潤州籍鴻得  
入歷旬堅守城既陷而猶鬪力雖屈而蹈節冠義而  
脫之因偽加朝散大夫即署曲阿令鴻貞而不諂詭  
應求伸既入邑則焚服闔門而設拒矣故得殿邦奮  
旅一境賴存淮海底績勲荅効功卒不言賞二亦不  
及君子以為急友成哀高義也臨危抗節秉禮也矯  
寇違禍明智也保邑匿勲近仁也義以利物智以周  
身禮以和衆仁以安人道有五常鴻擅其四武有七

德鴻秉其二大慮克就之謂貞好廉自克之謂節粵  
君夫子可謚為貞節也已於是紀名垂迹表墓勒石  
其詞曰

倬良士縱自大辨方物覈山川厥志大哉峻剛節  
殷義聲返旅襯晏窮城厥德邁哉哀斯人命莫贖  
德不朽溫如玉軌來世哉

唐故處士河南元公碣銘

其字子將撰  
少西行中

嗟我處士煥炳其文精微天象與道為隣類乎萬化  
子三十春在昔薄葬時服幅巾厥孤克孝永懷遷神  
君其心之無違返真表建豐碣追揚茂塵王門公路

豈微朱輪天才海學于何窶貧心焉有主孰知我艱  
烈烈皇考求仁得仁哀哀王母期恩斯勤李虔報養  
主褒感親退居更命喪禮終身忠為令德孝實至純  
一門二善千載不泯

平偃師碑尾

粵以長壽二年十月十七日改窆於衛縣苑樓之西  
北原夫令德所旆餘慶未也神龍紀曆皇運中興天  
子嚴祀清廟緬懷前哲乃下制曰朝議大夫守衛王  
府司馬上柱國元春父故偃師令某公門襲慶士林  
成則名教羽儀道德泉藪輔仁宜昧早謝昌辰積善



洋溢垂休茂胤時光祀夏慶屬配夫錫類之恩俾覃  
於卿士哀榮之典宜旌於泉路可贈蒲州長史君子  
謂成其子而植乎身義方也愛其臣而及其祖孝理  
也孝以行惠惠以察忠義以立慈慈以昭順君臣父  
子於是形焉

唐陳州龍興寺碑

觀夫廣大無相者虛空也四輪倚之而住精微無躰  
者佛性也萬法因之以生聖人有以見三界成壞皆  
有為殼故剖之以戒甯聖人有以見六趣輪迴是無  
明網故決之以定力爍寶光之慧炬而沛善利之慈

舟返迷路率於中道猗橫流登於彼岸以言乎真實  
之要總攝一乘以言乎天地之間曲成萬物大矣哉  
道心包舉等太虛而無際法教流通彌曠劫而常在  
則有乘如來方便出應化門用大士因緣處帝王位  
俾庶類咸若謂之光宅天下令衆生修善名為莊嚴  
佛龍興寺者皇帝即位之歲溥天之所置也唐祚  
中微周德更盛歷載十六姦臣擅命伯明氏有盜國  
之心一闡提有害聖之迹皇上操北斗起東朝排闥  
闔運扶搖張目而叱之殷乎若震雷發地歛鞮翕響  
以克彼二凶赫然若太陽昇天晞熙仰象以復我萬

邦返元后傳國之璽受光武登壇之玉尊祖繼宗郊  
天祀地之禮既洎脩舊布新改物班瑞之典又備乃  
考出世之法鼓大雉之事入無功用之品住不思議  
之力一光所燭庶兆為之清涼一音所宣大千為之  
振動雲蒸風靡不崇朝而壞衣涌塔徧天下矣陳州  
者上古太皞之墟近代淮陽之地置守則列為郡封  
王則建為國本其風俗豪侈靡嚴舊矣翻東門之下  
接袂成帷觴苑立之上炫服成市信豫章之郊一都  
會也刺史南陽韓府君名琦其為邦勝殘去殺聖主  
之得賢臣別駕彭城郡王名隆業其從政也能書而

恭高陽之有才子長史南陽張齊賢儒極之選司馬  
河南雲盈公族之良也士曹從事人人錄事參軍于  
璆為稱首六屬官人二十王人苑丘縣令崔脩已為  
稱首或以藝榮或以門進高車一轍美利同人禮舉  
形清於是乎在因邦甸積稔之蓄偶日月再旦之初  
欽若王言建靈寺上略其趾下務其終百工不勸而  
亟度役不徵而會經始如雲成之不日夫其帶四郭  
五衢之陌踞重墉闐闐之端福地砥平長垣雲矗高  
門有闕大廈斯飛連廊曲閣交軒對雷木磨而不雕  
土塗而不飾壯無僭侈以約費為功儉無偏陋以靜

居為寶法王宮殿近寶花之城菩薩伽藍住金燈之  
地亦猶是也上座處玄寺主真度維那守慎等戒珠  
如月獨潔麒麟之行法寶如山普聞獅子之吼克諧  
善衆底定神居甘露飽而盈滿天香醉而圍繞于時  
陳項之老衲衣而博帶皤皤然相造而誦曰久矣吾  
黨之惑也控侗顛蒙情嗜橫放恚愛我僕聰明不開  
日有忘其生生月無覺其滅滅一息之漏可勝言哉  
而今舉足至芋道場申臂及于淨土晝則目禪誦之  
事夜則耳鐘梵之音何悞是生晚臻斯樂豈不思天  
子至仁乎側下人之昏墊適上聖之昭軌假有相之

途詣無生之理灑冥澤於已滅蒂玄根於未始百靈之所歸依萬宇之所欣喜非獨陳而已矣蓋神闢天聖開地世之祖也纂帝寶基皇統孝之主也珍備狂破魔孽威無外也廣正典紹度門德無大也通幽洞明兼麗該精滂洋而行混濩厥成一收功而四善舉一推心而群顛立咨如是則龍興之化曷有量矣夫業可大而無爲不貽於後事可尊而蘊焉不述於世臣子之罪也敢請圖之然言語之不到者心識心識之不到者真如二乘聞之而不見十地見之而未了而我云何能說竊比六時之鳥七寶之樹是出乎和

雅音聲是讚乎微妙功德記其在處長者聖王在上  
於昭于天唐雖舊邦其命維新龍興返政滅二暴臣  
少康非擬於舜為隣皇王蒸哉

其一

於廓玄教生人戶牖神化洒心小大稽首掌擎萬域  
潛移仁壽三代之前蓋未曾有最上乘哉

其二

泱泱陳服韓侯道之奕奕寶坊邦人造之天龍護持  
賢聖熙熙受福維祺帝心則怡至理興哉

其三

唐玉泉寺大通禪師碑

譏夫總四大者成乎身矣立萬始者主乎心矣身是  
虛哉即身見空始同妙用心非實地觀心若幻乃等  
真如名教入焉妙本垂言說出焉真宗隱故如來  
有意傳要道力持至德萬劫而遣付法印一念而頓  
受佛身誰其弘之實大通禪師其人也禪師尊稱大  
通諱神秀本姓李陳留尉氏人也心洞九漏懸解先  
覺身長八尺秀眉大耳應王伯之象合聖賢之度少  
為諸生遊問江表老莊玄旨書易大義三乘經論四  
分律儀說通訓詁音參吳晉爛乎如襲孔翠珍然如



振金玉既而獨鑒潛發多聞旁施逮知天命之年自  
拔人間之世企聞蘄州有忍禪師禪門之法胤也自  
菩提達磨天竺東來以法傳惠可惠可傳僧璨僧璨  
傳道信道信傳弘忍繼明重跡相承五光乃不遠遐  
阻翻飛謁詣虛受與沃心懸會高悟與真同徹繡指  
忘識湛見本心任寂滅境行無罣是處有師而成即燃  
燈佛所無依而說是空王法門服勤六年不捨晝夜  
大師歎曰東山之法盡在秀矣命之洗足引之並坐  
於是滌辭而去退藏於密儀鳳中始隸玉泉名在僧  
錄寺東七里地坦山雄目之曰此正楞伽孤峯度門

蘭若蔭松藉草吾將老烏雲從龍風從虎大道出賢  
人觀岐陽之地就去成都華陰之山學來如市未去  
多也後進得以拂三有超四禪昇堂七十味道三千  
不是過也爾其開法大略則惠念以息想極力以攝  
心其入也品均凡聖其到也行無前後趣定之前萬  
緣盡閉發慧之後一切皆如特奉楞伽遞為心要過  
此以往未之或知久視羊禪師春高矣詔請而來跌  
坐覲君肩輿上殿屈萬乘而稽首洒九重而宴居傳  
聖道者不比面有盛德者無臣禮遂推為兩京法主  
三帝國師仰佛日之再中慶優曇之一現然處都邑

婉其秘旨每帝王分座后妃臨席鷓鷯四匝龍象三  
繞時熾炭待礦故對默而心降時訖飢投味故告約  
而義領一雨溥霑於衆緣萬籟各吹於本分非夫安  
住無畏應變無方者孰能焉爾乎聖敬日崇朝思代  
積當思軾問名卿表德非擬一局厭誼輦長懷虛壑  
累乞還山旣聽中駐久矣衰憊無他患苦報魄散神  
全形遺力謝神龍二年二月二十八日夜中顧命扶  
坐泊如化滅禪師武德八年乙酉受具於天宮至是  
年丙午復終於此寺蓋僧臘八十矣生於隋末百有  
餘歲未嘗自言故人莫審其數也三界火心四部水

背攘崩梁壞雷動雨泣凡諸寶身生是金口故其喪也如執親焉詔使弔哀侯王歸賙三月二日冊謚大通展節終之義禮也時厥五日假安闕塞綏及塋之期懷也宸駕臨決至午橋王公悲送至伊水羽儀陳設至山龕仲秋既望還詔乃下帝諾先許冥遂宿心太常卿鼓吹導引城門卽護監喪塋是日天子出龍門泣金觀登高停蹕日盡迴輿自伊及江扶道哀候幡花百輦香雲千里維十月哉生魄明卽舊居後岡安神起塔國錢嚴飾賜逾百萬巨鍾是先帝所鑄群經是後皇所錫金榜御題華幡內造塔寺尊重遠稱

標絕初禪師形解東洛相見南荆白霧積晦於禪山  
素蓮寄生於坐樹則雙林變色泗水逆流至人遠代  
同符異感百日卒哭也在龍花寺設大會八千人度  
二七人二样練縞也咸就西明道場如前會萬迴苦  
薩乞於後宮寶衣盈箱珍價敵國親舉寵費侑供巡  
香其廣福博因存沒如此日月逾邁榮落相推於戲  
法子永戀宗極痛慈舟之遽夫恨涌塔之遲開石城  
之歎也不孤廬山之碑焉可祚竊比子貢之論夫子  
也生於天地不知天地之高厚飲於江海不知江海  
之廣深強名迹以慰其心銘曰

額珠內隱 匪指莫效 心鏡外塵 匪磨莫照  
海巖安靜 風識牽樂 不入度門 孰探玄要  
倬哉禪伯 獨立天下 功收密詣 解却名假  
誦無所得 解亦都捨 月影空如 現於悟者  
無量善衆 為父為師 露清熱惱 光射昏疑  
異將任世 萬壽無期 柰何過隙 一朝去之  
嗟我門人 憂心斷續 進憶瞻仰 退思付囑  
盡不離定 空非滅覺 念茲在茲 敢告無學

玄識闡黎廬墓碑

夫孝者法象乎天地感通乎鬼神故愛敬之中又有

真報哀戚之外更追冥福玄識禪師其人也厥姓桑氏其先長樂人漢尚書洪之後曾祖梁州刺史諱千秋祖貴鄉令諱信考文林郎名爽自前代無違德基於累仁是生達者禪師智周萬物而理證本無頽度四生而見滅諸有以為空不離色體念子之慈業不士緣起思親之孝乃於萬山北陌滎陽東原塋先考文林府君先妣王氏負土成墳結廬其域置義井取施無求報鑄洪鍾取聞而悟道脩古寺造尊容取觀相生信若夫信生攝攝生靜靜生定定生慧慧於生滅處得常住心於虛空中立一切法其定慧之門乎禪

師昔宴坐介山群虎自擾今經行宰樹四衆依德至  
人寄凝寂雖罕見全象識者餘論亦時存一隅篆羨  
豐石寄詞偈云爾

邈矣上德行密道高哀哀父母生我劬勞禪心護念  
神足遊遨苦河雖廣曾不容舳甘井既深利物無竭  
不增不減不流不滯仁靜而鑒智動而悅華鍾既鏗  
椎椎法聲如來如去如滅如生不有奚得不為胡成  
寶地嚴飾金山晃耀善惡無門惟人所召境因心起  
理憑思照懿哉一心混成衆妙

張說之文集卷第十九



開化圖書館

Kaishwa library



開化圖書館

Kaishua library


趙

開化圖書館

Waihua Library

開化圖書館

Wahua Library



張說之文集

三

開化圖書館  
Kahua Library

開化圖書

Kaithua Library



Inches 1 2 3 4 5 6 7

Centimetres 1 2 3 4 5 6 7 8 9 10 11 12 13 14 15 16 17

**TIFFEN** Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color